

नमो नमो निम्मलदंसणस्स
पूज्य आनंद-क्षमा-ललित-सुशील-सुधर्मसागर गुरुभ्यो नमः

On Line – आगममंजूषा

[१०] पण्हावागरणं

* संकलन एवं प्रस्तुतकर्ता *

मुनि दीपरत्नसागर [M.Com., M.Ed., Ph.D.]

॥ किंचित् प्रास्ताविकम् ॥

ये आगम-मंजूषा का संपादन आजसे ७० वर्ष पूर्व अर्थात् वीर संवत् २४६८, विक्रम संवत्-१९९८, ई.स.1942 के दौरान हुआ था, जिनका संपादन पूज्य आगमोद्धारक आचार्यश्री [आनंदसागरसूरिजी](#) म.सा.ने किया था। आज तक उन्हीं के प्रस्थापित-मार्ग की रोशनी में सब अपनी-अपनी दिशाएँ ढूँढते आगे बढ़ रहे हैं।

हम ७० साल के बाद आज ई.स.-2012, विक्रम संवत्-२०६८, वीर संवत्-२५३८ में वो ही आगम-मंजूषा को कुछ उपयोगी परिवर्तनों के साथ इंटरनेट के माध्यम से सर्वथा सर्वप्रथम “**OnLine-आगममंजूषा**” नाम से प्रस्तुत कर रहे हैं।

*** मूल आगम-मंजूषा के संपादन की किंचित् भिन्नता का स्वीकार ***

- [१] आवश्यक सूत्र-(आगम-४०) में केवल मूल सूत्र नहीं है, मूल सूत्रों के साथ निर्युक्ति भी सामिल की गई है।
[२] जीतकल्प सूत्र-(आगम-३८) में भी केवल मूल सूत्र नहीं है, मूलसूत्रों के साथ भाष्य भी सामिल किया है।
[३] जीतकल्प सूत्र-(आगम-३८) का वैकल्पिक सूत्र जो “पंचकल्प” है, उनके भाष्य को यहाँ सामिल किया गया है।

[४] “ओघनिर्युक्ति”-(आगम-४१) के वैकल्पिक आगम “पिंडनिर्युक्ति” को यहाँ समाविष्ट तो किया है, लेकिन उनका मुद्रण-स्थान बदल गया है।

[५] “कल्प(बारसा)सूत्र” को भी मूल आगममंजूषा में सामिल किया गया है।

-मुनि दीपरत्नसागर

: Address:-

Mnui Deepratnasagar,
MangalDeep society, Opp.DholeswarMandir,
POST:- THANGADH Dist.surendranagar.
Mobile:-9825967397 jainmunideepratnasagar@gmail.com

मुनि दीपरत्नसागर



जंबू! 'इणमो अण्हयसंवरविणिच्छयं पवयणस्स निस्संदं। वोच्छामि णिच्छयत्थं सुहासियत्थं महेसीहिं ॥ १ ॥ (तेणं कालेणं तेणं समएणं चंपा-
 श्रीप्रश्नव्याकरणदशाङ्गम्- नामं नगरी होत्था, पुण्णभदे चेइए वणसंडे असोगवरपायवे पुढवीसिलापट्टए, तत्थ णं चंपाए नयरीए कोणिए नाम राया होत्था, धारिणी देवी,
 तेणं कालेणं० समणस्स भगवओ महावीरस्स अंतेवासी अज्जसुहम्मस्स नाम थेरे जाइसंपन्ने कुलसंपन्ने बलसंपन्ने रूवसंपन्ने विणयसंपन्ने नाणसंपन्ने दंसणसंपन्ने चरित्तसंपन्ने लज्जा-
 संपन्ने लाघवसंपन्ने ओयंसी तेयंसी वच्चंसी जसंसी जियकोहे जियमाणे जियमाए जियलोभे जियनिदे जियइंदिए जियपरीसहे जीवियासमरणभयविप्पमुक्के तवप्पहाणे गुणप्पहाणे
 मुत्तिप्पहाणे विज्जापहाणे मंतप्पहाणे बंभप्पहाणे वयप्पहाणे नयप्पहाणे नियमप्पहाणे सच्चप्पहाणे सोयप्पहाणे नाणप्पहाणे दंसणप्पहाणे चरित्तप्पहाणे चोदसपुब्बी चउनाणोवगए
 पंचहिं अणगारसएहिं सद्धिं संपरिवुडे पुब्बाणुपुब्बिं चरमाणे गामाणुगामं दूइज्जमाणे जेणेव चंपा नयरी तेणेव उवागच्छइ जाव अहापडिरूवं उग्गहं उग्गिण्हित्ता संजमेणं तवसा अप्पाणं
 भावेमाणे विहरति। तेणं कालेणं० अज्जसुहम्मस्स अंतेवासी अज्जजंबूनामं अणगारे कासवगोत्तेणं सत्तुस्सेहे जाव संखित्तविपुलतेयलेस्से अज्जसुहम्मस्स थेरस्स अदूरसामन्ते उडढंजाणू
 जाव संजमेणं तवसा अप्पाणं भावेमाणे विहरइ, तए णं से अज्जजंबू जायसड्ढे जायसंसए जायकोउहट्ठे उप्पन्नसद्धे० संजायसद्धे० समुप्पन्नसद्धे० उट्टाए उट्टेइ त्ता जेणेव अज्जसुहम्मस्स थेरे
 तेणेव उवागच्छइ त्ता अज्जसुहम्मं थेरं तिक्खुत्तो आयाहिणपयाहिणं करेइ त्ता वंदइ नमंसइ त्ता नच्चासन्ने नाइदूरे विणएणं पंजलिपुडे पज्जुवासमाणे एवं व०-जइ णं भंते! समणेणं
 भगवया महावीरेणं जाव संपत्तेणं णवमस्स अंगस्स अणुत्तरोववाइयदसाणं अयमट्ठे पं० दसमस्स णं भंते! अंगस्स पण्हावागरणाणं समणेणं जाव संपत्तेणं के अट्ठे पं०?, जंबू! दसमस्स अंग-
 स्स समणेणं जाव संपत्तेणं दो सुयक्खंधा पं०-आसवदारा य संवरदारा य, पढमस्स णं भंते! सुयक्खंधस्स समणेणं जाव संपत्तेणं कइ अज्झयणा पं०?, जंबू! पढमस्स णं सुयक्खं-
 धस्स समणेणं जाव संपत्तेणं पंच अज्झयणा पं०, दोच्चस्स णं भंते!० एवं चेव, एएसिं णं भंते! अण्हयसंवराणं समणेणं जाव संपत्तेणं के अट्ठे पं०?, तते णं अज्जसुहम्मस्स थेरे जंबूनामेणं

५१७ प्रश्नव्याकरणांगं, अ-११८०-१

मुनि दीपरत्नसागर

अणगारेणं एवं वुत्ते समाने जंबुं अणगारं एवं व०-पा०) 'पंचविहो पण्णत्तो जिणेहि' इह अण्हओ अणादीओ। हिंसा मोसमदत्तं अब्बंभ परिग्गहं चेव ॥२॥ जारिसओ १ जंनामा २ जह य कओ ३ जारिसं फलं देति ४। जेविय करेंति पावा पाणवहं ५ तं निसामेह ॥३॥ पाणवहो नाम एस निच्चं जिणेहिं भणिओ-पावो चंडो रुदो खुदो साहसिओ अणारिओ णिग्घिणो णिस्संसो महब्भओ पइभओ १० अतिभओ बीहणओ तासणओ अणज्जो उब्वेयणओ य णिरवयक्खो णिद्धम्मो णिप्पिवासो णिक्कलुणो निरयवासगमणनिधणो २० मोहमहब्भयपयट्ठओ मरणा-वेमणस्सो २२। पढमं अधम्मदारं १। तस्स य नामाणि इमाणि गोण्णाणि होंति तीसं, तं०-पाणवहं उम्मूलणा सर्रीराओ अवीसंभो हिंसविहिंसा तहा अकिच्चं च घायणा मारणा य वहणा उद्वणा तिवायणा य १० आरंभसमारंभो आउयकम्मस्सुवद्वो भेयणिट्ठवणगालणा य संवट्ठगसंखेवो मच्चू असंजमो कडगमद्वणं वोरमणं परभवसंकामकारओ दुग्गतिप्पवाओ पावकोवो य पावलोभो २० छविच्छेओ जीवियंतकरणो भयंकरो अणकरो य वज्जो परितावणअण्हओ विसाणो निज्जवणा लुंपणा गुणाणं विराहणत्ति ३० विय तस्स एवमादीणि णाम-धेज्जाणि होंति तीसं पाणवहस्स कलुसस्स कडुयफलदेसगाइं १२। तं च पुण करेंति केई पावा अस्संजया अविरया अणिहुयपरिणामदुप्पयोगी पाणवहं भयंकरं बहुविहं बहुप्पगारं पर-दुक्खुप्पायणप्पसत्ता इमेहिं तसथावरेहिं जीवेहिं पडिणिविट्ठा, किं ते?, पाढीणतिमितिमिं गिलअणेगझसविविहजातिमंडुक्कदुविहकच्छभणक्कमगरदुविहगाहादिलिवेढयमंदुयसीमागा-रपुलुयसुं सुमारबहुप्पगारजलयरविहाणाकते य एवमादी कुरंगरुसरभचमरसंवरउरब्भससयपसयगोणसरोहियहयगयखरकरभखग्गवानरगवयविगसियालकोलमज्जारकोल(क पा०)-सुणकसिरियंदलगावत्तकोकंतियगोकणमियमहिसविग्घल्लगलदीवियासाणतरच्छअच्छभल्लसद्धूलसीहचिल्ललचउप्पयविहाणाकए य एवमादी अयगरगोणसवराहिमउल्लिकाओदरद-ब्भपुप्फयासालियमहोरगोरगविहाणकए य एवमादी छीरलसरंबसेहसेल्लगगोधुंदरणउलसरडजाहगमुगुंसखाडहिलवाउपइयधीरोलियसिरीसिवगणे य एवमादी कादंबकबकबलाकासार-सआडासेतीकुललवंजुलपारिप्पवकीवसउणदीविय(पीलिय)हंसधत्तरिट्ठगभासकुलीकोसकुंचदगतुंडेणियालगसूयीमुहकविलपिंगलक्खगकारंडगचक्कवागउक्कोसगरुलपिंगुलसुयवरहिण-मयणसालनंदीमुहनंदमाणगकोरंगभिं गारगकोणालगजीवजीवकतित्तिरवट्ठकलावककपिंजलककवोतकपारेवयगचिडिग(प्र० वडग)टिंककुक्कुडवेसरमयूरगचउरगहयपोंडरीयसालाग(कर-क पा०)वीरल्लसेणवायसयविहंगभि(प्र० से)णासिचासवग्गुलिचम्मट्टिलविततपक्खिखहयरविहाणाकते य एवमायी जलथलखगचारिणो उ पंचिंदिए पसुगणे बियतियचउरिंदिए य विविहे जीवे पियजीविए मरणदुक्खपडिकूले वराए हणंति बहुसंकिलिट्ठकम्मा, इमेहिं विविहेहिं कारणेहिं, किं ते?, चम्मवसामंसमेयसोणियजगफिप्फिसमत्थुलुंगहितयंतपित्तफोफसदंतट्ठा अट्ठिमिंजनहनयणकण्णह्णारुणिनक्कधमणिसिं गदाढिपिच्छविसविसाणवालहेउं, हिंसंति य भमरमधुकरिणो रसेसु गिद्धा तहेव तेंदिए सर्रीरोवकरणट्ठयाए किवणे बेंदिए बहवे वत्थो-हारपरिमंडणट्ठा, अण्णेहिं एवमाइएहिं बहूहिं कारणसतेहिं अबुहा इह हिंसंति तसे पाणे इमे य एगिंदिए बहवे वराए तसे य अण्णे तदस्सिए चेव तणुसरिरे समारंभंति अत्ताणे असरणे अणाहे अबंधवे कम्मनिगलबद्धे अकुसलपरिणाममंदबुद्धिजणदुव्विजाणए पुढवीमये पुढवीसंसिए जलमए जलगए अणलाणिलतणवणस्सतिगणनिस्सिए य तम्मयतज्जिते (जिते पा०) चेव तदाहारे तप्परिणतवण्णगंधरसफास(प्र० फरिस) बोंदिरूवे अचक्खुसे चक्खुसे य तसकाइए असंखे थावरकाए य सुहुमबायरपत्तेयसर्रीरनामसाधारणे अणंते हणंति अविजाणओ य परिजाणओ य जीवे इमेहिं विविहेहिं कारणेहिं, किं ते?, करिसणपोक्खरणीवाविवप्पिणिकूवसरतलागचितिवेतियखातियआरामविहारथूभपागारदारगोउरअट्ठालगचरियासेतुसंकम-पासायविकप्पभवणघ(प्र० पु)रसरणलेणआवणचेतियदेवकुलचित्तसभापवाआयतणावसहभूमिघरमंडवाण य कए भायणभंडोवगरणस्स विविहस्स य अट्ठाए पुढविं हिंसंति मंदबुद्धिया जलं च मज्जणयपाणभोयणवत्थधोवणसोयमादिएहिं पयणपयावणजलावणविदंसणेहिं अगणिं सुप्पवियणतालयंटपेहुणमुहकरयलसागपत्तवत्थमादिएहिं अणिलं अगारपरिवा(डिया)र-भक्खभोयणसयणासणफलकमुसलउखलततविततातोज्जवहणवाहणमंडवविविहभवणतोरणविडंगदेवकुलजालयद्धचंदनिज्जूगचंदसालियवेतियणिस्सेणिदोणिचंगेरिखीलमेढकसभापवा-वसहगंधमल्लानुलेवणंवरजुयनंगलमइयकुलियसंदणसीयारहसगडजाणजोग्गअट्ठालगचरिअदारगोपुरफलिहाजंतसूलिय(प्र० सुलय)लउडमुसंडिसतग्घिबहुपहरणावरणुवक्खराण कते अण्णेहि य एवमादिएहिं बहूहिं कारणसतेहिं हिंसन्ति ते तरुणो, भणिता एवमादी सत्तपरिवज्जिया उवहणन्ति दढमूढा दारुणमती कोहा माणा माया लोभा हस्सरतीअरतीसोय-वेदथीजीयकामत्थधम्महेउं सवसा अवसा अट्ठा अणट्ठाए य तसपाणे थावरे य हिंसंति, हिंसंति मंदबुद्धी सवसा हणंति अवसा हणंति सवसा अवसा दुहओ हणंति, अट्ठा हणंति अणट्ठा हणंति अट्ठा अणट्ठा दुहओ हणंति, हस्सा हणंति वेरा हणंति रतीय हणंति हस्सवेरारतीय हणंति कुद्धा हणंति लुद्धा हणंति मुद्धा हणंति कुद्धा लुद्धा मुद्धा हणंति अत्था हणंति धम्मा हणंति कामा हणंति अत्था धम्मा कामा हणंति ३। कयरे ते?, जे ते सोयरिया मच्छबंधा साउणिया वाहा कूरकम्मा वाउरिया दीवितबंधणप्पओगतप्पगलजालवीरल्लगायसीदब्भ-

वगुराकूडलेलिहत्था (दीविया पा०) हरिएसा साउणिया य वीदंसगपासहत्था वणचरगा लुद्धयमहुघातपोतघाया एणीयारा पएणियारा सरदहदीहिअतलागपल्लपरिगालणमलणसो-
 त्तबंधणसल्लिअसपसोसगा विसगरस्स य दायगा उत्तणवल्लरदवग्गिणिइयपल्लीवका कूरकम्मकारी इमे य बहवे मिलक्खुजाती, के ते?, सकजवणसबरबब्बरगायमुहुंडोदभडगतित्तियपक्क-
 णियकुलक्खगोडसीहलपारसकोंचंधविलबिल्लुलपुल्लिंदअरोसडोंबपोक्कणगंधहारगबहलीयजल्लरोममासबउसमलया चुंचुया य चूलिया कोंकणगा मेतपण्हवमालवमहुर(प्र० मग्घर)आ-
 भासिया अणक्कचीणल्हासियखसखासिया नेहुरमरहट्टमुट्टिअआरबडोबिलगकुहणकेकयहूणरोमगरु(प्र० भ)रुमरुगा चिलायविसयवासी य पावमतिणो जलयरथलयरसणप्फतोरगखह-
 चरसंडासतोंडजीवोवघायजीवी सण्णी य असण्णिणो य पज्जत्ता असुभलेस्सपरिणामा एते अण्णे य एवमादी करेति पाणातिवायकरणं पावा पावाभिगमा पावरुई पाणवहकयरतीया
 पाणवहरूवाणुट्टाणा पाणवहकहासु अभिरमंता तुट्टा पावं करेत्तुं होंति य बहुप्पगारं, तस्स य पावस्स फलविवागं अयाणमाणा वड्ढंति महब्भयं अविस्सामवेयणं दीहकालबहुदुक्खसं-
 कडं नरयतिरिक्खजोणिं, इओ आउक्खए चुया असुभकम्मबहुला उववज्जंति नरएसु हुलितं महालएसु वयरामयकुड्डरुद्धनिस्संधिदारविरहियनिम्मद्वभूमितल्लखरामरिसविसमणि-
 रयघरचारएसुं महोसिणसयावतत्तदुग्गंधविस्सउव्वेयजणगेसु बीभच्छदरिसणिज्जेसु निच्चं हिमपडलसीयलेसु कालोभासेसु य भीमगंभीरलोमहरिसणेसु णिरभिरामेसु निप्पडियारवा-
 हिरोगजरापील्लिएसु अतीव निच्चंधकारतमिस्सेसु पतिभएसु ववगयगहचंदसूरणक्खत्तजोइसेसु मेयवसामंसपडलपोच्चडपूयरुहिरुक्किणविल्लीणचिक्कणरसिया वावण्णकुहियचिक्खल्लक-
 इमेसु कुकूलानलपलित्तजालमुम्मुरअसिक्खुरकरवत्तधारासु निसितविच्छुयडंकनिवातोवम्मफरिसअतिदुस्सहेसु य अत्ताणासरणकडुयदुक्खपरितावणेसु अणुबद्धनिरंतरवेयणेसु जमपु-
 रिससंकुलेसु, तत्थ य अन्तोमुहुत्तलद्धिभवपच्चएणं निवत्तेति उ ते सरीरं हुंडं बीभच्छदरिसणिज्जं बीहणगं अट्टिणहारुणहरोमवज्जियं असुभगंधदुक्खविसहं, ततो य पज्जत्तिमुवगया इंदि-
 एहिं पंचहिं वेदेति असुभाए वेयणाए उज्जलबलविउल(प्र० तिउल)उक्कडखरफरुसपयंडघोरबीहणगदारुणाए, किं ते?, कंदुमहाकुंभियपयणपउलणतवगतलणभट्टभज्जणाणि य लो-
 हकडाहुक्कड्डणाणि य कोट्टबलिकरणकोट्टणाणि य सामलित्तिक्खग्गलोहकंटकअभिसरणपसारणाणि फालणविदालणाणि य अवकोडकबंधणाणि लट्टिसयतालणाणि य गल्लगवल्लुडंब-
 णाणि सूलग्गभयणाणि य आएसपवंचणाणि खिसणविमाणणाणि विघुट्टपणिज्जणाणि वज्झसयमातिकाति य एवं ते पुव्वकम्मकयसंचयोवत्ता निरयग्गिमहग्गिसंपलित्ता गाढदुक्खं
 महब्भयं कक्कसं असायं सारीरं मानसं च तिच्चं दुव्विसहं वेदेति वेयणं पावकम्मकारी बहूणि पल्लिओवमसागरोवमाणि कलुणं पालेन्ति ते अहाउयं जमकातियतासिता य सद्दं करेति भीया,
 किं तं?, अवि भायसामिमायबप्पताय जितवं मुय मे मरामि दुब्बलो वाहिपीलिओऽहं किं दाणि सि? एवं दारुणो णिइय! मा देहि मे पहारे उस्सासेतं मुहुत्तयं मे देहि पसायं करेहि
 मा रुस वीसमामि गेविज्जं मुयह मे मरामि, गाढं तण्हातिओ अहं देह पाणीयं हंता पिय इमं जलं विमलं सीयलंति घेत्तूण य नरयपाला तवियं तउयं से देति कलसेण अंजलीसु दट्ठूण
 य तं पवेवियंगोवंगा अंसुपगलंतपप्पुयच्छा छिण्णा तण्हाइयम्ह कलुणाणि जंपमाणा विप्पेक्खन्ता दिसोदिसिं अत्ताणा असरणा अणाहा अबंधवा बंधुविप्पहूणा विपलायंति य मिगा
 इव वेगेण भयुव्विग्गा, घेत्तूण बला पलायमाणाणं निरणुकंपा मुहं विहाडेत्तुं लोहडंडेहिं कलकलं ण्हं वयणांसि लुभंति केई जमकाइया पासंता, तेण दड्ढा संतो रसंति य भीमाइं विस्सराइं
 रुवंति य कलुणगाइं पारेवतगाव, एवं पलवितविलावकलुणाकंदियबहुरुद्धरुद्धियसदो परिदेवितरुद्धबद्धयनारकारवसंकुलो णीसट्टो रसियभणियकुविउक्कूइयनिरयपालतज्जिय गेण्हक्कम पहर
 छिंद भिंद उप्पाडेहुक्खणाहि कत्ताहि विकत्ताहि य भुज्जो हण विहण विच्छुभोच्छुब्भ आकड्ड विकड्ड, किं ण जंपसि? सराहि पावकम्माइं दुक्कयाइं एवं वयणमहप्पगम्भो पडिसुया-
 सदसंकुलो तासओ सया निरयगोयराण महाणगरडज्झमाणसरिसो निग्घोसो सुव्वए अणिट्टो तहियं नेरइयाणं जाइजंताणं जायणाहिं, किं ते?, असिवणदब्भवणजंतपत्थरसूइतलक्खा-
 रवाविकलकलन्तवेयरणिकलंबवालुयाजलियगुहनिरुंभणउसिणोसिणकंटइल्लदुग्गमरहजोयणतत्तलोहमग्गगमणवाहणाणि इमेहिं विविहेहिं आयुहेहिं, किं ते?, मोग्गरमुसुंठिकरकयसत्ति-
 हलगयमुसलचक्ककोंततोमरसूललउलभिंडिमालसद्द(द्ध)लपट्टिसचम्मेट्टुहुणमुट्टियअसिखेडगखग्गचावनारायकणकप्पणिवासिपरसुटंकतिक्वनिम्मल अण्णेहि य एवमादिएहिं असु-
 भेहिं वेउव्विएहिं पहरणसतेहिं अणुबद्धतिव्वेरा परोप्परवेयणं उदीरेति अभिहणंता, तत्थ य मोग्गरपहारचुणियमुसुंठिसंभग्गमहितदेहा जंतोवपीलणफुरंतकप्पिया केइत्थ सचम्मका
 विगत्ता णिम्मूललूणकण्णोट्टासिका छिण्णहत्थपादा असिकरकयतिक्वकोंतपरसुप्पहारफालियवासीसंतच्छित्तंगमंगा कलकलमाणखारपरिसित्तगाढडज्झंतगतकुंतग्गभिण्णजज्जरिय-
 सव्वदेहा विलोलंति महीतले विसूणियंगमंगा (निग्गयंगजीवा पा०) तत्थ य विगसुणगसियालकाकमज्जारसरभदीवियवियग्घवगसद्दूलसीहदप्पियखुहाभिभूतेहिं णिच्चकालमणसिएहिं
 घोरा रसमाणभीमरूवेहिं अक्कमित्ता दढदाढागाढडक्कडिडयसुतिक्खनहफालियउद्धदेहा विच्छिप्पंते समंतओ विमुक्कसंधिबंधणा वियंगमंगा कंककुररगिद्धघोरकट्टवायसगणेहि य पुणो

खरथिरददणक्खलोहतुं देहिं ओवतित्ता पक्खाहयतिक्खणक्खविकिञ्चजिभंछियनयणनिद्धओलुग्गविगतवयणा उक्कोसंता य उप्पयंता निपतंता भमंता पुब्वकम्मोदयोवगता पच्छाणुसएण
 डज्झमाणा णिंदंता पुरेकडाइं कम्माइं पावगाइं तहिं २ तारिसाणि ओसन्नचिक्कणाइं दुक्खातिं अणुभवित्ता ततो य आउक्खएणं उब्वट्टिया समाणा बहवे गच्छंति तिरियवसहिं दुक्खुत्तरं
 सुदारुणं जम्मणमरणजरावाहिपरियट्ठणारहं जलथल्लखहचरपरोप्परविहिंसणपवंचं इमं च जगपागडं वरागा दुक्खं पावेन्ति दीहकालं, किं ते ?, सीउण्हतण्हाखुहवेयणअप्पईकारअट्टवि-
 जम्मणणिच्चभउव्विग्गवासजग्गणवहबंधणताडणंकणनिवायणअट्टिभंजणनासाभेयप्पहारदूमणच्छविच्छेयणअभिओगपावणकसंकुसारनिवायदमणाणि वाहणाणि य मायापितिविप्पयो-
 गसोयपरिपीलणाणि य सत्थग्गिविसाभिघायगल्लगवल्लआवल्लणमारणाणि य गल्लजालुच्छिप्पणाणि पउल्लणविकप्पणाणि य जावजीविगबंधणाणि पंजरनिरोहणाणि य सयूहनिद्धाडणाणि
 य धमणाणि य दोहणाणि य डगल्लबंधणाणि य वाडगपरिवारणाणि य पंकजलनिमज्जणाणि य वारिप्पवेसणाणि य ओवायणिभंगविसमणिवडणदवग्गिजाल्लदहणाइं य. एवं ते दुक्ख-
 सयसंपत्तिता नरगाउ आगया इहं सावसेसकम्मा तिरिक्खपंचंदिएसु पाविति पावकारी कम्माणि पमायरागदोसबहुसंचियाइं अतीव अस्सायकक्कसाइं भमरमसगमच्छिमाइएसु य
 जाइकुल्लकोडिसयसहस्सेहिं नवाहिं चउरिंदियाण तहिं तहिं चेव जम्मणमरणाणि अणुभवता कालं संखेज्जकं भमंति नेरइयसमाणतिव्वदुक्खा फरिसरसणघाणचक्खुसहिया तहेव तेइंदि-
 एसु कुंथुपिपील्लिकाअवधिकादिकेसु य जातिकुल्लकोडिसयसहस्सेहिं अट्टहिं अणूणएहिं तेइंदियाण तहिं २ चेव जम्मणमरणाणि अणुहवंता कालं संखेज्जकं भमंति नेरइयसमाणति-
 व्वदुक्खा फरिसरसणघाणसंपउत्ता गंडूलयजल्लयकिमियचंदणगमादिएसु य जातीकुल्लकोडिसयसहस्सेहिं सत्तहिं अणूणएहिं बेइंदियाण तहिं २ चेव जम्मणमरणाणि अणुहवंता कालं
 संखिज्जकं भमंति नेरइयसमाणतिव्वदुक्खा फरिसरसणसंपउत्ता पत्ता एगिंदियत्तणंपि य पुढवीजल्लजल्लणमारुयवणप्फती सुहुमबायरं च पज्जत्तमपज्जत्तं पत्तेयसरीरणाम साहारणं च
 पत्तेयसरीरजीविएसु य तत्थवि कालमसंखेज्जगं भमंति अणंतकालं च अणंतकाए फासिंदियभावसंपउत्ता दुक्खसमुदयं इमं अणिट्ठं पाविति पुणो तहिं चेव परभवतरुगणगणे (गहणे
 पा०) कोट्ठालकुल्लियदालणसलिलमल्लणखुंभणरुंभणअणल्लणिलविविहसत्थघट्टणपरोप्पराभिहणणमारणविराहणाणि य अकामकाइं परप्पओगोदीरणाहि य कज्जपओयणेहि य पेस्सप-
 सुनिमित्तओसहाहारमाइएहिं उक्खणणउक्कत्थणपयणकोट्टणपीसणपिट्टणभज्जणगाल्लणआमोडणसडणफुडणमज्जणल्लेयणतच्छणविलुंचणपत्तज्झोडणअग्गिदहणाइयातिं. एवं ते भवपरं-
 परादुक्खसमणुबद्धा अटंति संसारबीहणकरे जीवा पाणाइवायनिरया अणंतकालं, जेविय इह माणुसत्तणं आगया कहंचि नरगा उब्वट्टिया अधन्ना तेविय दीसंति पायसो विकयविग-
 ल्लूवा खुज्जा वडभा य वामणा य बहिरा काणा कुंटा पंगुला विउला य मूका य (अविय जल्लमूया पा०) मंमणा य अंधयगा एगचक्खू विणिहयसचे (पिस पा०) ल्लया वाहिरोगपी-
 ल्लियअप्पाउयसत्थवज्झवाला कुल्लक्खणुक्किन्नदेहा दुब्बलकुसंधयणकुप्पमाणकुसंठिया कुरूवा किविणा य हीणा हीणसत्ता निच्चं सोक्खपरिवज्जिया असुहदुक्खभागा णरगाओ उब्वट्टंति
 इहं सावसेसकम्मा. एवं णरगं तिरिक्खजोणिं कुमाणुसत्तं च हिंइमाणा पावंति अणंताइं दुक्खाइं पावकारी, एसो सो पाणवहस्स फलविवागो इहलोइओ परलोइओ अप्पसुहो बहु-
 दुक्खो महब्भयो बहुरयप्पगाढो दारुणो कक्कसो असाओ वाससहस्सेहिं मुच्चति, न य अवेदयित्ता अत्थि हु मोक्खोत्ति एवमाहंसु, नायकुल्लनंदणो महप्पा जिणो उ वीरवरनामधेज्जो
 कहेसीय पाणवहस्स फलविवागं, एसो सो पाणवहो चंडो रुद्धो खुद्धो अणारिओ निग्घिणो निस्संसो महब्भओ बीहणओ तासणओ अणज्जो उब्वेयणओ य णिरवयक्खो निद्धम्मो नि-
 प्पिवासो निक्कल्लुणो निरयवासगमणनिधणो मोहमहब्भयपवड्ढओ मरणवेमणसो । पढमं अहम्मदारं समत्तंतिबेमि । ४ ॥ द्वारं १ ॥ जंबू ! बितियं च दारं अल्लियवयणं लहुसगल्लहुचवल-
 भणियं भयंकरं दुहकरं अयसकरं वेरकरं अरतिरतिरागदोसमणसंकिलेसवियरणं अल्लियनियडिसातिजोयबहुलं नीयजणनिसेवियं निस्संसं अप्पच्चयकारकं परमसाहुगरहणिज्जं परपी-
 लाकारकं परमकिण्हलेस्ससहियं दुग्गइविणिवायवड्ढणं भवपुणब्भवकरं चिरपरिचियमणुगतं दुरन्तं कित्तियं बितितं अधम्मदारं । ५ । तस्स य णामाणि गोष्णाणि होंति तीसं, तं०-
 अल्लियं सटं अणज्जं मायामोसा असंतकं कूडकवडमत्थुगं च निरत्थयमवत्थयं च विहेसगरहणिज्जं अणुज्जुकं कक्कणा य १० वंचणा य भिच्छापच्छाकडं च साती उ उच्छन्नं उक्कलं च
 अट्टं अब्भक्खाणं च किब्बिसं वल्लयं गहणं च २० मम्मणं च नूमं निययी अप्पच्चओ असमओ असच्चसंधत्तणं विवक्खो अवहीयं (आणाइयं पा०) उवहिअसुद्धं अवलोवोत्ति ३०. अविय
 तस्स एयाणि एवमादीणि नामधेज्जाणि होंति तीसं सावज्जस्स अल्लियस्स वड्ढजोगस्स अणेगाइं । ६ । तं च पुण वदंति केई अल्लियं पावा असंजया अविरया कवडकुडिल्लकडुयचडुल्लभावा
 कुद्धा लुद्धा भया य हस्सट्टिया य सकूखी चोरचारभडा खंडरक्खा जियजूईकरा य गहियगहणा कक्ककुरुगकारगा कुल्लिगी उवहिया वाणियगा य कूडतुल्लकूडमाणी कुडकाहावणोव-
 जीवी पडगारकलायकारुड्ढा वंचणपरा चारियचाटुयारनगरगोत्तियपरिचारगा दुट्ठवायिसूयकअणबल्लभणिया य पुब्वकालियवयणदच्छा साहसिका लहुस्सगा असच्चा गारविया असच्च-
 ट्ठावणाहिचित्ता उच्चच्छंदा अणिग्गहा अणियता छंदेण मुक्कवाता भवंति अल्लियाहिं जे अविरया, अवरे नत्थिकवादिणो वामलोकवादी भणंति नत्थि जीवो न जाइ इह परे वा (१३०)

लोए न य किंचिवि फुसति पुत्रपावं नत्थि फलं सुकयदुक्कयाणं पंचमहाभूतियं सरीरं भासंति हे ! वातजोगजुत्तं, पंच य खंधे भणंति केई. मणं च मणजीविका वदंति, वाउजीवोत्ति एवमाहंसु. सरीरं सादियं सनिधणं इह भवे एगे भवे तस्स विप्पणासंमि सब्बनासोत्ति, एवं जंपंति मुसावादी. तम्हा दाणवयपोसहाणं तवसंजमबंभचेरकल्लाणमाइयाणं नत्थि फलं नवि य पाणवहे अलियवयणं न चेव चोरिककरणपरदारसेवणं वा सपरिग्गहपावकम्मकरणंपि नत्थि किंचि न नेरइयतिरियमणुयाण जोणी न देवलोको वा अत्थि न य अत्थि सिद्धिगमणं अम्मापियरो नत्थि नवि अत्थि पुरिसकारो पच्चक्खाणमवि नत्थि नवि अत्थि कालमच्चू य अरिहंता चक्कवट्ठी बलदेवा वासुदेवा नत्थि नेवत्थि केई रिसओ धम्माधम्मफलं च नवि अत्थि किंचि बहुयं च थोवकं वा. तम्हा एवं विजाणिऊण जहा सुबहु इंदियाणुकूलेसु सब्बविसएसु वट्ठह णत्थि काई किरिया वा अकिरिया वा एवं भणंति नत्थिकवादिणो वामलोगवादी, इमंपि वितीयं कुदंसणं असब्भाववाइणो पण्णवेति मूढा-संभूतो अंडकाओ लोको सयंभूणा सयं च निम्मिओ, एवं एयं अलियं. पयावइणा इस्सरेण य कयंति केति, एवं विण्हुमयं कसिणमेव य जगंति केई. एवमेके वदंति मोसं एको आया अकारको वेदको य सुकयस्स दुक्कयस्स य करणाणि कारणाणि सब्बहा सब्बहिं च निच्चो य निक्किओ निग्गुणो य अणुव (अन्नो अ पा०) लेवओत्तिविय एवमाहंसु असब्भावं, जंपि इहं किंचि जीवल्लोके दीसइ सुकयं वा दुक्कयं वा एयं वा जदिच्छाए वा सहावेण वावि दइवतप्पभावओ वावि भवति, नत्थेत्थ किंचि कयकतत्तं लक्खणविहाणनियतीए कारियं एवं केई जंपंति इड्ढिरससातगारवपरा बहवे करणालसा परूवेति धम्मवीमंसएण मोसं, अवेरे अहम्मओ रायदुट्ठं अब्भक्खाणं भणंति- अलियं चोरोत्ति अचोरयं करेत्तं डामरिउत्तिवि य एमेव उदासीणं दुस्सीलोत्ति य परदारं गच्छति मइलित्ति सीलकलियं अयंपि गुरुतप्पओ अण्णे एमेव भणंति उवाहणंता मित्तक- लत्ताइं सेवंति अयंपि लुत्तधम्मो इमोवि विसंधायओ पावकम्मकारी अगम्मगामी अयं दुरप्पा बहुएसु य पापगेसु जुत्तोत्ति एवं जंपंति मच्छरी, भदके वा गुणकित्तिनेहपरलोगनिप्पि- वासा, एवं ते अलियवयणदच्छा परदोसुप्पायणप्पसत्ता वेढेन्ति अक्खातियबीएण अप्पाणं कम्मबंधणेण मुहरी असमिक्खियप्पत्तावा निक्खेवे अवहरंति परस्स अत्थंमि गढियगिद्धा अभिजुंजंति य परं असंतएहिं लुद्धा य करेत्ति कूडसक्खित्तणं असच्चा अत्थालियं च कन्नालियं च भोमालियं च तह गवालियं च गरुयं भणंति अहरगतिगमणं, कारणं अन्नंपि य जाति- रूक्कलसीलपच्चयं मायाणिगुणं चवलपिसुणं परमट्ठभेदकमसंकं विदेसमणत्थकारकं पावकम्ममूलं दुड्ढिट्ठं दुस्सुयं अमुणियं निहज्जं लोकगरहणिज्जं वहबंधपरिकिलेसबहुलं जरामरण- दुक्खसोयनिम्मं असुद्धपरिणामसंकिलिट्ठं भणंति अलिया हिंसंति संनिविट्ठा असंतगुणुदीरका य संतगुणनासका य हिंसाभूतोवघातितं अलियसंपउत्ता वयणं सावज्जमकुसलं साहुगरह- णिज्जं अधम्मजणणं भणंति अणभिगयपुत्रपावा, पुणोवि अधिकरणकिरियापवत्तकां बहुविहं अणत्थं अवमइं अप्पणो परस्स य करेत्ति, एमेव जंपमाणा महिससूकरे य साहंति घाय- गाणं ससयपसयरोहिए य साहंति वागुराणं तित्तिरवट्ठकलावके य कविंजलकवोयके य साहंति साउणीणं झसमगरकच्छभे य साहंति मच्छियाणं संखंके खुट्टए य साहंति मगराणं (मग्गिणं पा०) अयगरगोणसमंडलिद्वीकरे मउली य साहंति वालवीणं (वायलियाणं पा०) गोहासेहगसल्लगसरडके य साहंति लुद्धगाणं गयकुलवानरकुले य साहंति पासियाणं सुकबरहिणमयणसालकोइलहंसकुले सारसे य साहंति पोसगाणं वधबंधजावणं च साहंति गोम्मियाणं धणधन्नगवेलए य साहंति तक्कराणं गामागरनगरपट्ठणे य साहंति चारियाणं पारघाइयपंथघातियाओ साहंति गंठिभेयाणं कयं च चोरियं नगरगोत्तियाणं लंछणनिहंछणधमणदुहणपोसणवणणदवणवाहणादियाइं साहंति बहूणि गोम्मियाणं धातुमणिसिलप्पवा- लरयणागरे य साहंति आगरीणं पुप्फविहिं फलविहिं च साहंति मालियाणं अग्घमहुकोसए य साहंति वणचराणं जंताइं विसाइं मूलकम्मं आहेव(हिब्र पा०)णआविंधणआभिओगमं- तोसहिप्पओगे चोरियपरदारगमणबहुपावकम्मकराणं उक्खंधे गामघातवाओ वणदहणतलागभेयणाणि बुद्धिविसविणासणाणि वसीकरणमादियाइं भयमरणकिलेसदोसजणणाणि भाव- बहुसंकिलिट्ठमलिणाणि भूतघातोवघातियाइं सच्चाइंपि ताइं हिंसकाइं वयणाइं उदाहरंति पुट्ठा वा अपुट्ठा वा परतत्तियवावडा य असमिक्खियभासिणो उवदिसंति सहसा उट्ठा गोणा गवया दंमंतु परिणयवया अस्सा हत्थी गवेलगकुक्कुडा य किज्जंतु किणावेध य विक्केह पयह य सयणस्स देह पियय(खादत पिबत दत्त च पा०) दासिदासभयकभाइल्लका य सिस्सा य पेसकजणो कम्मकरा य किंकरा य एए सयणपरिजणो य कीस अच्छंति भारिया भे करित्तु (करित्तु पा०) कम्मं गहणाइं वणाइं खेत्तखिलभूमिवल्लराइं (ल्लिच्चन्तामखिलभूमिवल्लराणि पा०) उत्तणधणसंकडाइं डज्झंतु सूडिज्जंतु य रुक्खा भिज्जंतु जंतभंडाइयस्स उवहिस्स कारणाए बहुविहस्स य अट्ठाए उच्छू दुज्झंतु पीलिज्जंतु य तिला पयावेह य इट्ठकाउ मम घरट्ठयाए खेत्ताइं कसह कसावेह य लहुं गामआगरनगरखेडकब्बडे निवेसेह अडवीदेसेसु विपुलसीमे पुप्फाणि य फलाणि य कंदमूलाइं कालपत्ताइं गेण्हेह करेह संचयं परिजणट्ठयाए साली वीही जवा य लुच्चंतु मलिज्जंतु उप्फणिज्जंतु य लहुं च पविसंतु य कोट्टागारं अप्पमहउक्कोसगा य हंमंतु पोयसत्था सेणा णिज्जाउ जाउ डमरं घोरा वट्ठंतु य संगामा पवहन्तु य

सगडवाहणाइं उवणयणं चोलगं विवाहो जन्नो अमुगम्मि उ होउ दिवसेसु करणेसु मुहुत्तेसु तिहिसु य अज्ज होउ णवणं मुदितं बहुखज्जपिज्जकलियं कोतुकं विण्हावणकं संतिकम्माणि कुणह ससिरविगहोवरागविसमेसु सज्जणपरियणस्स य नियकस्स य जीवियस्स परिरक्खणट्टयाए पडिसीसकाइं च देह देह य सीसोवहारे विविहोसहिमज्जमंसभक्खन्नपाणमट्ठाणुलेव-
णपईवजल्लिउज्जल्लसुगंधिधूवावकरपुप्फफल(प्र० बलि)समिद्धे पायच्छित्ते करेह पाणाइवायकरणेणं बहुविहेणं विवरीउप्पायदुस्सुभिणपावसउणअसोमग्गहचरियअमंगलनिमित्तपडिघाय-
हेउं वित्तिच्छेयं करेह मा देह किंचि दाणं सुट्ठु हओ सुट्ठु छिन्नो भिन्नत्ति उवदिसंता एवंविहं करेति अलियं मणेण वायाए कम्मणा य अकुसला अणज्जा अलियपाणो अलियध-
म्मणिरया अलियासु कहासु अभिरमंता तुट्ठा अलियं करेत्तु होति य बहुप्पयारं । ७ । तस्स य अलियस्स फलविवागं अयाणमाणा वड्ढेति महम्मयं अविस्सामवेयणं दीहकालं बहु-
दुक्खसंकटं नरयतिरियजोणिं तेण य अलिएण समणुबद्धा आइद्धा पुणब्भवंधकारे भमंति भीमे दुग्गतिवसहिमुवगया. ते य दीसंतिह दुग्गया दुरंता परवसा अत्थभोगपरिवज्जिया अ-
सुहिता फुडियच्छविबीभच्छविवन्ना खरफरुसविरत्तज्झामज्झुसिरा निच्छाया लल्लुविफलवाया असक्कतमसक्कया अगंधा अचेयणा दुभगा अकंता काकस्सरा हीणभिन्नघोसा विहिंसा
जडबहिरन्धमूया य मम्मणा अकं(क पा०)तविकयकरणा णीया णीयजणनिसेविणो लोगगरहणिज्जा भिच्चा असरिसजणस्स पेस्सा दुम्मेहा लोकवेदअज्झप्पसमयसुतिवज्जिया नरा
धम्मबुद्धिवियला अलिएण य तेणं पडज्झमाणा असंतएण य अवमाणणपट्टिमंसाहिक्खेवपिसुणभेयणगुरुबंधवसयणमित्तवक्खारणादियाइं अब्भक्खाणाइं बहुविहाइं पावेति अणुप-
माणि (अमणोरमाइं पा०) हिययमणदूमकाइं जावज्जीवं दुरुद्धराइं अणिट्टसरफरुसवयणतज्जणनिब्भच्छणदीणवदणविमणा कुभोयणा कुवाससा कुवसहीसु किलिस्संता नेव सुहं नेव
निव्वुइं उवलभंति अच्चंतविपुलदुक्खसयसंपत्ति(प्र० उ)त्ता. एसो सो अलियवयणस्स फलविवाओ इहलोइओ परलोइओ अप्पसुहो बहुदुक्खो महम्मओ बहुरयप्पगाढो दारुणो कक्कसो
असाओ वाससहस्सेहिं मुच्चइ, न य अवेदयित्ता अत्थि हु मोक्खोत्ति एवमाहंसु. नायकुलनंदणो महप्पा जिणो उ वीरवरनामधेज्जो कहेसीय अलियवयणस्स फलविवागं एयं तं विती-
यंपि अलियवयणं लहुसगलहुचवलभणियं भयंकरं दुहकरं अयसकरं वेरकरं अरतिरतिरागदोसमणसंकिलेसविरयणं अलियणियडिसादिजोगबहुलं नीयजणनिसेवियं निस्संसं अप्प-
च्चयकारकं परमसाहुगरहणिज्जं परपीलाकारगं परमकण्हलेससहियं दुग्गतिविनिवायवड्ढणं पुणब्भवकरं चिरपरिचियमणुगयं दुरंतं. बितियं अधम्मदारं समत्तं । ८ ॥ दारं २ ॥ जंबु! तइयं
च अदत्तादाणं हरदहमरणभयकलुसतासणपरसंतिगऽभेज्जलोभमूलं कालविसमसंसियं अहोऽच्छिन्नतण्हपत्थाणपत्थाइमइयं अकित्तिकरणं अणज्जं छिद्दमंतरविधुरवसणमग्गणउस्सवम-
त्तप्पमत्तपसुत्तवंचणक्खिखवणघायणपराणिहुयपरिणामतक्करजणबहुमयं अकलुणं रायपुरिसरक्खियं सया साहुगरहणिज्जं पियजणमित्तजणभेदविप्पीतिकारकं रागदोसबहुलं पुणो य
उप्पूर(प्र० थूर)समरसंगामडमरकलिकलहवे(प्र० व)हकरणं दुग्गइविणिवायवड्ढणं भवपुणब्भवकरं चिरपरिचितमणुगयं दुरंतं, तइयं अधम्मदारं । ९ । तस्स य णामाणि गोच्चाणि होंति
तीसं. तं० चोरिकं परहडं अदत्तं कूरिकडं (कुसट्टयकयं पा०) परलाभो असंजमो परधणंमि गेही लोलिकं तक्करत्तणंति अवहारो १० हत्थलत्तणं (लहुत्तं पा०) पावकम्मकरणं तेणिकं
हरणविप्पणासो आदियणा लुंपणा धणाणं अप्पच्चओ अ(प्र० ओ)वीलो अक्खेवो खेवो २० विक्खेवो कूडया कुलमसी य कंखा लात्तप्पणपत्थणा य (आससणा य पा०) वसणं इच्छा-
मुच्छा य तण्हागेहि नियडिकम्मं अपरच्छंतिविय ३०, तस्स एयाणि एवमादीणि नामधेज्जाणि होंति तीसं अदिच्चादाणस्स पावकलिकलुसकम्मबहुलस्स अणेगाइं । १० । तं पुण करेति
चोरियं तक्करा परदब्रहरा छेया कयकरणलद्धलक्खा साहसिया लहुस्सगा अतिमहिच्छलोभगत्था दइरओवीलका य गेहिया अहिमरा अणभंजकभग्गसंधिया रायदुड्ढकारी य विसय-
निच्छूढलोलबज्झा उद्दोहकगामघाययपुरघायगपंधघायगआलीवगतिथभेया लहुहत्थसंपउत्ता जूइकरा खंडरक्खत्थी चोरपुरिसचोरसंधिच्छेया य गंधिभेदगंधणहरणलोमावहारअ-
क्खेवी(घ पा०)हडकारका निम्मद्वगगूढचोरकगोचोरगअस्सचोरगदासिचोरा य एक(प्र० थक्क)चोरा ओकड्ढकसंपदायकउच्छिपकसत्थघायकबिलचोरी(कोली) कारका य निग्गाह-
विप्पलुंपगा बहुविहतेणिक(प्र० तहव)हरणबुद्धी. एते अन्ने य एवमादी परस्स दव्वा हि जे अविरया०, विपुलबलपरिग्गहा य बहवे रायाणो परधणंमि गिद्धा सए व दव्वे असंतुट्ठा परविसए
अहिहणंति ते लुद्धा परधणस्स कज्जे चउरंगविभत्त(प्र० समंत)बलसमग्गा निच्छियवरजोहजुद्धसद्वियअहमहमितिदप्पिएहिं (सेन्नेहिं पा०) संपरिवुडा पउम(प्र० त्त)सगडसूइचक्कसागर-
गरुलवूहातिएहिं अणिएहिं उत्थरंता अभिभूय हरंति परधणाइं अवरे रणसीसलद्धलक्खा संगामंमि अतिवयंति सन्नद्धबद्धपरियरउप्पीलियचिंधपट्टगहियाउहपहरणा माटिवर(गूढ पा०)-
वम्मगुंडिया आविद्धजालिका कवयकंकडइया उरसिरमुहबद्धकंठतोणमाइतवरफलहरचितपहकरसरहसखरचावकरकरंछियसुनिसितसरवरिसचटकरकमुयंत(मंते पा०)घणचंडवेगधारा-
निवायमग्गे अणेगधणुमंडलग्गसंधिता उच्छलियसत्तिकणगवामकरगहियखेडगनिम्मलनिक्किट्टखग्गपहरंतकोततोमरचक्कगयापरसुमुसललंगलसूललउलभिंडमात्तासब्बलपट्टिसचम्मेडुदु-

घणमोट्टियमोगगरवरफलिहजंतपत्थरदुहणतोणकुवेणीपीढकलियईलीपहरणमिलिमिलिमिलंतखिप्पंतविजुजलविरचितसम्पहणभतले फुडपहरणे महारणसंखभेरि(प्र० दुन्दुभि)वर-
 तूरपउरपडुपहडाहयणिणायगंभीरणंदितपक्खुभियविपुलघोसे हयगयरहजोहतुरितपसरितउद्धततमंधकारबहुले कातरनरणयणहिययवाउलकरे विलुलियउक्कडवरमउडतिरीडकुंडलोडुदा-
 माडोवियम्मि पागडपडागउसियज्झयवेजयंतिचामरचलंतछत्तंधकारगम्भीरे हयहेसियहत्थिगुलुगुलाइयरहघणघणाइयपाइक्कहरहराइयअप्फोडियसीहनाया छेलियविघुट्टुक्कुट्टुछंठगय-
 सहभीमगज्जिए सयरहहसंतरुसंतकलकलरवे आसूणियवयणरुहे भीमदसणाधरोट्टगाढदट्टे सम्पहरणुजयकरे अमरिसवसतिव्वरत्तनिदारितच्छे वेरदिट्टिकुद्धचिट्टियतिवलीकुडिलभिउडि-
 कयनिलाडे वहपरिणयनरसहस्सविक्रमवियंभियबले वग्गंततुरगरहपहावियसमरभडावडियछेयलाघवपहारसाधितासमूसवियबाहुजुयले मुक्कट्टहासपुक्कंतबोलबहुले फलफलगावरणग-
 हियगयवरपत्थितदरियभडखलपरोप्परपलग्गजुद्धगद्वितविउसितवरासिरोसतुरियअभिमुहपहरितंछिन्नकरिकरविभंगितकरे अवइट्टनिसुद्धभिन्नफालियपगलियरुहिरकतभूमिकइमचिलि-
 चिह्णपहे कुच्छिविदालियगलितरुलितनिभेहंतंतफुरुफुरंतविगलमम्माहयविकयगाढदिन्नपहारमुच्छितरुलंतवैभलविलावकलुणे हयजोहभमंततुरगउदाममत्तकुंजरपरिसंकितजणनिलुक्के
 छिन्नधयभग्गरहवरनट्टसिरकरिकलेवराकिन्नपतितपहरणविकिन्नाभरणभूमिभागे नच्चंतकबंधपउरभयंकरवायसपरिलेंतगिद्धमंडलभमंतच्छायंधकारगंभीरे वसुवसुहविकंपितव्व पच्चक्खपि-
 उवणं परमरुद्धीहणगं दुप्पवेसतरगं अभिवयंति संगामसंकडं, परधणं महंता अवरे पाइक्कचोरसंधा सेणावतिचोरवंदपागडिढका य अडवीदेसदुग्गवासी कालहरितरत्तपीतसुक्किह्णअणे-
 गसयचिंधपट्टबद्धा परविसए अभिहणंति लुद्धा धणस्स कज्जे रयणागरसागरं च उम्मीसहस्समालाउलाकुलवितोयपोतकलकलेंतकलियं पायालसहस्सवायवसवेगसलिलउद्धम्ममाणदग-
 रयरयंधकारं वरफेणपउरधवलपुलंपुलसमुट्टियट्टहासं मारुयविच्छुभमाणपाणियजलमालुप्पीलहुलियं अविय समंतओ खुभियलुलियखोखुब्भमाणपक्खलियचलियविपुलजलचक्कवालम-
 हानईवेगतुरियआपूरमाणगंभीरविपुलआवत्तचवलभममाणगुप्पमाणुच्छलंतपच्चोणियत्तपाणियपधावियखरफरुसपयंडवाउलियसलिलं फुट्टंतवीतिकलोलसंकुलजलं महामगरमच्छकच्छ-
 भोहारगाहतिमिसुंसुमारसावयसमाहयसमुद्धायमाणकपूरघोरपउरं कायरजणहिययकंपणं घोरमारसंतं महब्भयं भयंकरं पतिभयं उत्तासणगं अणोस्परं आगासं चेव निरवलंबं उप्पाइयप-
 वणधणितनोल्लियउवरुवरितरंगदरियअतिवेगवेगचक्खुपहमुच्छरंतं कत्थई गंभीरविपुलगज्जियगुंजियनिग्घायगरुयनिवतितसुदीहनीहारिदूरसुव्वंतगंभीरधुगुधुगंतसहं पडिपहरुंभंतजक्खर-
 क्खसकुहंडपिसाय(रुसियतजाय पा०)उवसग्गसहस्ससंकुलं बहूप्पाइय(उवदव पा०)भूयं विरचितबलिहोमधूवउवचारदिन्नरुधिरच्चणाकरणपयतजोगपययचरियं परियन्तजुगंतकाल-
 कप्पोवमं दुरंतमहानईनईवइमहाभीमदरिसणिज्जं दुरणुच्चरं विसम्पवेसं दुक्खुत्तारं दुरासयं लवणसलिलपुण्णं असियसियसमूसियगेहिं हत्थतरकेहिं वाहणेहिं अइवइत्ता समुद्धमज्झे
 हणंति गंतूण जणस्स पोते परदव्वहरण(हराण)रभसनिरणुकंपा (नरा पा०) निरावयक्खा गामागरनगरखेडकब्बडमडंबदोणमुहपट्टणासमणिगमजणवते य धणसमिद्धे हणंति थिरहियय-
 छिन्नलज्जा बंदिग्गहगोग्गहे य गेण्हंति दारुणमती णिक्किवा धणियं हणंति छिंदंति गेहसंधिं निक्खित्ताणि य हसंति धणधन्नदव्वजायाणि जणवयकुलाणं णिग्घिणमती परस्स दव्वाइं जे
 अविरया०, तहेव केई अदिन्नादाणं गवेसमाणा कालाकालेसु संचरंता चियकापज्जलियसरसदरदड्ढकडिढयकलेवरे रुहिरलित्तवयणअखत(अदर पा०)खातियपीतडाइणिभमंतभयंकरे
 जंबुयक्खिक्खियंते घूयकयघोरसहे वेयालुट्टियनिसुद्धकहकहितपहसितवीहणकनिरभिरामे अतिदुब्भिगंधवीभच्छदरिसणिज्जे सुसाणवणसुन्नघरलेणअंतरावणगिरिकंदरविसमसावयस-
 माकुलासु वसहीसु किलिस्संता सीतातवसोसियसरीरा दड्ढच्छवी निरयतिरियभवसंकडदुक्खसंभारवेयणिजाणि पावकम्माणि संचिणंता दुल्लहभक्खन्नपाणभोयणा पिवासिया झुंझिया
 किलंता मंसकुणिमकंदमूलजंकिंचिकयाहारा उव्विग्गा उप्पुया असरणा अडवीवासं उव्वंति वालसतसंकणिज्जं अयसकरा तक्करा भयंकरा कास हारामोत्ति अज्ज दव्वं इति सामत्थं करंति
 गुज्झं बहुयस्स जणस्स कज्जकरणेसु विग्घकरा मत्तपमत्तपसुत्तवीसत्थछिद्धघाता वसणब्भुदएसु हरणबुद्धी विगव्व रुहिरमहिया परंति नरवतिमजायमतिकंता सज्जणजणदुगुंछिया
 सकम्मेहिं पावकम्मकारी असुभपरिणया य दुक्खभागी निच्चाइलदुहमनिबुद्धमणा इहलोके चेव किलिस्संता परदव्वहरा नरा वसणसयसमावण्णा । ११ । तहेव केई परस्स दव्वं गवेसमाणा
 गहिता य हया य बद्धरुद्धा य तुरियं अतिधाडिया पुरवरं सम्पपिया चोरग्गहचारभडचाडुकराण तेहि य कप्पडप्पहारनिदयआरक्खियखरफरुसवयणतज्जणगलच्छलुच्छल्लणाहिं विमणा
 चारगवसहिं पवेसिया निरयवसहिसरिसं तत्थवि गोमियप्पहारदूमणनिब्भच्छणकडुयवदणभेसणगा(गभया पा०)भिभूया अक्खित्तनियंसणा मल्लिणदंडिखंडनिवसणा उक्कोडालंचपा-
 समग्गणपरायणेहिं दुक्खसमुदीरणेहिं गोम्मियभडेहिं विविहेहिं बंधणेहिं, किं ते ?, हडिनिगडवालरज्जुयकुदंडगवरत्तलोहसंकलहत्थंदुयवज्झपट्टदामकणिक्कोडणेहिं अच्चेहि य एवमादि-
 एहिं गोम्मिकभंडोवकरणेहिं दुक्खसमुदीरणेहिं संकोडमोडणाहिं वज्झंति मंदपुच्चा संपुडकवाडलोहपंजरभूमिघरनिरोहकूवचारगकीलगजूयचक्कविततबंधणखंभालणउद्धचलणबंधणवि-

हम्मणाहि य विहेडयन्ता अवकोडकगाढउरसिरबद्धउद्धपूरितफुरंतउरकडगमोडणामेडणाहिं बद्धा य नीससंता सीसावेढउरुयावलचप्पडगसंधिबंधणतत्तसलागसूइयाकोडणाणि तच्छणवि-
माणणाणि य खारकट्टयतित्तनावणजायणाकारणसयाणि बहुयाणि पावियंता उरक्खडोदिन्नगाढपेणअट्टिकसंभग्गसंपंसुलीगा गलकालकलोहदंडउरउदरवत्थिपरिपीलिता मत्थंतहि-
ययसंचुण्णियंगमंगा आणत्तीकिंकरेहिं केति अविराहियवेरिएहिं जमपुरिससन्निहेहिं पहया ते तत्थ मंदपुण्णा चवेडवेलावज्झपट्टपाराइंछिवकसलतवरत्तनेत्तप्पहारसयतालियंगमंगा कि-
वणा लंबंतचम्मवणवेयणविमुहियमणा घणकोट्टिमनियलजुयलसंकोडियमोडिया य कीरंति निरुच्चार एया अन्ना य एवमादीओ वेयणाओ पावा पावेंति अदन्तिदिया वसट्टा बहुमो-
हमोहिया परधणंमि लुद्धा फासिंदियविसयतिवगिद्धा इत्थीगयरूवसरसगंधइट्टरतिमहितभोगतण्हाइया य धणतोसगा गहिया य जे नरगणा पुणरवि ते कम्मदुव्वियद्धा उवणीया राय-
किंकराण तेसिं बहसत्थगपाढयाणं विलउलीकारकाणं लंचसयगेण्हाणं कूडकवडमायानियडिआयरणपणिहिवंचणविसारयाणं बहुविहअलियसतजंपकाणं परलोकपरम्महाणं निरयग-
तिमामियाणं तेहि य आणत्तजीयदंडा तुरियउग्घाडिया पुरवरे सिंघाडगतियचउक्कचच्चरचउम्मुहमहापहपहेसु वेत्तदंडलउडकट्टलेट्टुपत्थरपणालिपणोहिमुट्ठिलयापादपणिहजाणुको-
प्परपहारसंभग्गमहियगत्ता अट्टारसकंमकारणा जाइयंगमंगा कलुणा सुक्कोट्टकंठगलकतालुजीहा जायंता पाणीयं विगयजीवियासा तण्हादिता वरागा तंपिय ण लभंति वज्झपुरिसेहिं
धाडियंता तत्थ य खरफरूस्पडहघट्टितकूडग्गहगाढरुट्टनिसट्टपरापुट्टा वज्झकरकुडिजुयनियत्था सुरत्तकणवीरगहियविमुकुलकंठेगुणवज्झदूतआविद्धमल्लदामा मरणभयुप्पण्णसेदआय-
तणेहुत्तुपियकिलिन्नगत्ता चुण्णगुंडियसरीररयरेणुभरियकेसा कुसुंभगोक्किन्नमुद्धया छिन्नजीवियासा घुन्नंता वज्झपाणपीया(याण भीता पा०) तिलंतिलं चेव छिज्जमाणा सरीरविक्रन्त-
लोहिओलित्ता कागणिमंसाणि खावियंता पावा खरफरूस्पएहिं तालिजमाणदेहा वातिकनरनारीसंपरिवुडा पेच्छिजंता य नागरजणेण वज्झनेवत्थिया पणेजंति नयरमज्जेण किवण-
कलुणा अत्ताणा असरणा अणाहा अबंधवा बंधुविप्पहीणा विपेक्खिता दिसोदिसिं मरणभयुव्विग्गा आघायणपडिदुवारसंपाविया अधन्ना सल्लग्गविलग्गभिन्नदेहा, ते य तत्थ कीरंति
परिकप्पियंगमंगा उल्लंभिज्जंति रुक्खसालासु केई कलुणाइं विलवमाणा अवरे चउरंगधणियबद्धा पव्वयकडगा पमुच्चंते दूरपातबहुविसमपत्थरसहा अन्ने य गयचलणमलणयनिम्महिया
कीरंति पावकारी अट्टारसखंडिया य कीरंति मुंडपरसूहिं केई उक्कत्तकन्नोट्टनासा उप्पाडियनयणदसणवसणा जिब्भदियऽच्छिया छिन्नकन्नसिरा पणिजंते छिज्जन्ते य असिणा नि-
व्विसया छिन्नहत्थपाया पमुच्चंते जावजीवबंधणा य कीरंति केई परदव्वहरणलुद्धा कारगलनियलजुयलरुद्धा चारगावहतसारा सयणविप्पमुक्का मित्तजणनिरिक्ख(रक्कि)या निरासा बहुज-
णधिकारसदलजायिता अलज्जा अणुबद्धखुहा पारद्धसीउण्हतण्हवेयणदुग्घट्टिया विवन्नमुहविच्छविया विहलमतिलदुब्बला किलंता कासंता वाहिया य आमाभिभूयगत्ता परूढनहकेसमं-
सुरोमा लगमुत्तंमि नियगंमि खुत्ता तत्थेव मया अकामका बंधिऊण पादेसु कडिढया खाइयाए लूढा तत्थ य बगसुणगसियालकोलमज्जारचंडसंदसगतुंडपक्खिगणविविहमुहसयलविलु-
त्तगत्ता कयविहंगा केई किमिणा य कुहियदेहा अणिट्टवयणेहिं सप्पमाणा सुट्टु कयं जं मउत्ति पावो तुट्टेणं जणेण हम्ममाणा लज्जावणका य होंति सयणस्सविय दीहकालं मया
संता, पुणो परलोगसमावन्ना नरए गच्छंति निरभिरामे अंगारपलित्तककप्पअच्चत्थसीतवेदणअस्साउदिन्नसयतदुक्खसयसमभिद्दुते ततोवि उव्वट्टिया समाणा पुणोवि पवज्जंति तिरि-
यजोणि तहिंपि निरयोवमं अणुहवंति वेयणं, ते अणंतकालेण जति नाम कहिंचि मणुयभावं लभंति णेगेहिं णिरयगतिगमणतिरियभवसयसहस्सपरियट्टेहिं तत्थविय भवंतऽणारिया
नीचकुलसमुप्पण्णा आरियजणेवि लोगवज्झा तिरिक्खभूता य अकुसला कामभोगतिसिया जहिं निबंधंति निरयवत्तणिभवप्पवंचकरणपणोहिं पुणोवि संसार(रा)वत्तणेममूले धम्मसुति-
विवज्जिया अणज्जा कूरा मिच्छत्तसुतिपवन्ना य होंति एगंतदंडरूढणो वेढेंता कोसिकारकीडोव्व अप्पगं अट्टकम्मतंतुघणबंधणेणं, एवं नरगतिरियनरअमरगमणपेरंतचक्कवालं जम्मजरा-
मरणकरणगम्भीरदुक्खपखुभियपउरसलिलं संजोगविओगवीचीचिंतापसंगपसरियवहबंधमहल्लविपुलकल्लोलकलुणविलवितलोभकलकलितबोलबहुलं अवमाणणफेणं तिबखिसणपुलं-
पुलप्पभूयरोगवेयणपराभवविणिवातफरूस्सधरिसणसमावडियकट्टिणकम्मपत्थरतरंगरंगंतनिच्चमच्चुभयतोयपट्टं कसायपायालसंकुलं भवसयसहस्सजलसंचयं अणंतं उव्वेयणयं अणोरपारं
महब्भयं भयंकरं पइभयं अपरिमियमहिच्छकलुसमतिवाउवेगउद्धम्ममाणआसापिवासपायालकामरतिरागदोसबंधणबहुविहसंकप्पविपुलदगरयरयंधकारं मोहमहावत्तभोगभममाणगुप्प-
माणुच्छलंतबहुगम्भवासपच्चोणियत्तपाणियं पधावित(वाहिय पा०)वसणसमावन्नरुन्नचंडमारुयसमाहयामणुन्नवीचीवाकुलितभग्गफुट्टंतनिट्टकल्लोलसंकुलजलं पमातबहुचंडदुट्टसाव-
यसमाहयउद्धायमाणगपूरघोरविद्धंसणत्थबहुलं अण्णाणभमंतमच्छपरिहत्थं अनिहुतिंदियमहामगरतुरियचरियखोखुब्भमाणसंतावनिचयचलंतचवलचंचलअत्ताणऽसरणपुव्वकयकम्म-
संचयोदिन्नवज्जवेइजमाणदुहसयविपाकघुन्नंतजलसमूहं इडिढरससायगारवोहारगहियकम्मपडिबद्धसत्तकडिढजमाणनिरयतलहुत्तसन्नविसन्नबहुला अरइरइभयविसायसोगमिच्छत्त-
सेलसंकडं अणातिसंताणकम्मबंधणकिलेसचिक्खिल्लसुदुत्तरं अमरनरतिरियनिरयगतिगमणकडिलपरियत्तविपुलवेलं हिंसाऽलियअदत्तादाणमेहुणपरिग्गहारंभकरणकारावणाणु-(१३१)

मोदणअट्टविहअणिट्टकम्मपिहितगुरुभारकंतदुग्गजलोघदूरपणोल्लिजमाणउम्मुग्गनिमुग्गदुल्लभतलं सारीरमणोमयाणि दुक्खाणि उप्पियंता सातस्सायपरित्तावणमयं उब्बुड्डनिबुड्डयं करेता चउरंतमहंतमणवयग्गं रुद्धं संसारसागरं अट्टियं अणालंबणमपतिट्टाणमप्पमेयं चुलसीतिजोणिसयसहस्सगुविलं अणालोकमंधकारं अणंतकालं निच्चं उत्तत्थसुण्णभयसण्णसंपउत्ता वसंति उब्धिगावासवसहिं जहिं २ आउयं निबंधंति पावकम्मकारी बंधवजणसयणमित्तपरिवज्जिया अणिट्टा भवंति अणादेजदुब्धिणीया कुठाणासणकुसेजकुभोयणा असुइणो कुसंधय-
णकुप्पमाणकुसंठिया कुरूवा बहुकोहमाणमायालोभा बहुमोहा धम्मसन्नसम्मत्तपब्भट्टा दारिद्रोवइवाभिभूया निच्चं परकम्मकारिणो जीवणत्थरहिया किविणा परपिंडतक्का दुक्ख-
लद्धाहारा अरसविरसतुच्छकयकुच्छिपूरा परस्स पेच्छंता रिद्धिसक्कारभोयणविसेससमुदयविहिं निंदंता अप्पकं कयंतं च परिवयंता इह य पुरेकडाइं कम्माइं पावगाइं विमणसो सोएण
डच्छमाणा परिभूया होंति सत्तपरिवज्जिया य सोभासिप्पकलासमयसत्थपरिवज्जिया जहाजायपसुभूया अवियत्ता णिच्चनीयकम्मोवजीविणो लोयकुच्छणिज्जा मोघमणोरहा निरास-
बहुला आसापासपडिबद्धपाणा अत्थोपायाणकामसोक्खे य लोयसारे होंति अफलवंतका य सुदट्टुविय उज्जमंता तद्विवसुज्जुत्तकम्मकयदुक्खसंठवियसिस्थपिंडसंचयपक्खीणदव्वसारा
निच्चं अधुवधणधण्णकोसपरिभोगविवज्जिया रहियकामभोगपरिभोगसव्वसोक्खा परसिरिभोगोवभोगनिस्साणमग्गणपरायणा वरागा अकामिकाए विणेंति दुक्खं णेव सुहं णेव निव्वुत्ति
उवलभंति अच्चंतविपुलदुक्खसयसंपलित्ता परस्स दव्वेहिं जे अविरया, एसो सो अदिण्णादाणस्स फलविवागो इहलोइओ पारलोइओ अप्पसुहो बहुदुक्खो महब्भओ बहुरयप्पगाढो
दारुणो कक्कसो असाओ वाससहस्सेहिं मुच्चति, न य अवेयइत्ता अत्थि उ मोक्खोत्ति एवमाहंसु, णायकुलनंदणो महप्पा जिणो उ वीरवरनामधेज्जो कहेसी य अदिण्णादाणस्स फल-
विवागं एयं, तं ततियंपि अदिनादाणं हरदहमरणभयकलुसतासणपरसंतिकभेजलोभमूलं एवं जाव चिरपरिगतमणुगतं दुरंतं, ततियं अहम्मदारं समत्तंतिबेमि । १२ ॥ द्वारं ३ ॥ जंबू !
अबंभं च चउत्थं सदेवमणुयासुरस्स लोयस्स पत्थणिज्जं पंकपणयपासजालभूयं थीपुरिसनपुंसवेदचिंधं तवसंजमबंभचेरविग्घं भेदायतणबहुपमादमूलं कायरकापुरिससेवियं सुयणज-
णवज्जणिज्जं उड्डनरयतिरियतिलोक्कपइट्टाणं जरामरणरोगसोगबहुलं वधबंधविघातदुब्बिघायं दंसणचरित्तमोहस्स हेउभूयं चिरपरिचित्तमणुगयं दुरंतं, चउत्थं अधम्मदारं । १३ । तस्स
य णामाणि गोन्नाणि इमाणि होंति तीसं, तं०-अबंभं मेहुणं चरंतं संसग्गि सेवणाधिकारो संकप्पो बाहणा पदाणं दप्पो मोहो मणसंखेवो १० अणिग्गहो वुग्गहो विघाओ विभंगो
विब्भमो अधम्मो असीलया गामधम्मतित्ती रति राग २० कामभोगमारो वेरं रहस्सं गुज्झं बहुमाणो बंभचेरविग्घो वावत्ति विराहणा पसंगो कामगुणो ३० त्तियं, तस्स एयाणि एवमा-
दीणि नामधेज्जाणि होंति तीसं । १४ । तं च पुण निसेवंति सुरगणा सअच्छरा मोहमोहियमती असुरभुयगगरुलविज्जुजलणदीवउदहिदिसिपवणथणिया अणवंनिपणवंनियइसिवादिय-
भूयवादियकंदियमहाकंदियकुहंडपयंगदेवा पिसायभूयजक्खरक्खसकिंनरकिंपुरिसमहोरगगंधव्वा तिरियजोइसविमाणवासिमणुयगणा जलयरथलयरखहयरा य मोहपडिबद्धचित्ता अ-
वितण्हा कामभोगतिसिया तण्हाए बलवईए महईए समभिभूया गढिया य अतिमुच्छिया य अबंभे उस्सण्णं तामसेण भावेण अणुम्मक्का दंसणचरित्तमोहस्स पंजरंपिव करेंति अन्नो-
ऽन्नं सेवमाणा भुज्जो असुरसुरतिरियमणुअभोगरतिविहारसंपउत्ता य चक्कवट्ठी सुरनरवतिसक्कया सुरवरुद्ध देवलोए भरहणगणगरणियमजणवयपुरवरदोणमुहखेडकब्बडमडंबसंवाह-
पट्टणसहस्समंडियं थिमियमेयणीयं एगच्छत्तं ससागरं भुंजिऊण वसुहं नरसीहा नरवई नरिंदा नरवसभा मरुयवसभकप्पा अब्भहियं रायतेयलच्छीए दिप्पमाणा सोमा रायवंसतिलगा
रविससिसंखवरचक्कसोत्थियपडागजवमच्छकुम्मरहवरभगभवनविमाणतुरयतोरणगोपुरमणिरयणनंदियावत्तमुसलणंगलसुरइयवरकप्परुक्खमिगवतिभदासणसुरूविथूभवरमउडसरिय-
कुंडलकुंजरवरवसभदीवमंदिरगरुलद्वयइंदकेउदप्पणअट्ठावयचावबाणनक्खत्तमेहमेहलवीणाजुगलत्तदामदामिणिकमंडलुकमलघंटावरपोतसूइसागरकुमुदागरमगरहारगागरनेउरणगण-
गरवइरकिन्नरमयूरवररायहंससारसचकोरचक्कागमिहुणचामरखेडगपव्वीसगविपंचिवरतालियंटसिरियाभिसेयमेइणिखग्गंकुसविमलकलसभिंजारवद्धमाणगपसत्थउत्तमविभत्तवरपुरिस-
लक्खणधरा बत्तीसंवररायसहस्साणुजायमग्गा चउसट्टिसहस्सपवरजुवतीण णयणकंता रत्ताभा पउमपम्हकोरंटगदामचंपकसुतवियवरकणकनिहसवन्ना सुजायसवंगसुंदरंगा महग्घवरपट्ट-
णुग्गयविचित्तरागएणिपेणिणिम्मियदुगुल्लवरचीणपट्टकोसेजसोणीसुत्तक(जाखोमिय पा०)विभूसियंगा वरसुरभिगंधवरचुण्णवासवरकुसुमभरियसिरया कप्पियच्छेयायरियसुकयरइत-
मालकडगं(कुंडलं पा०)गयतुडियपवरभूसणपिणद्धदेहा एकावलिकंठसुरइयवच्छा पालंबपलंबमाणसुकयपडउत्तरिज्जमुदियापिंगलंगुलिया उज्जलनेवत्थरइयचेल्लगविरायमाणा तेएण
दिवाकरोव दित्ता सारयनवत्थणियमहुरगंभीरनिद्धघोसा उप्पन्नसमत्तरयणचक्करयणप्पहाणा नवनिहिइणो समिद्धकोसा चाउरंता चाउराहिं सेणाहिं समणुजातिज्जमाणमग्गा तुरगवती
गयवती रहवती नरवती विपुलकुलवीसुयजसा सारयससिसकलसोमवयणा सूर तेलोक्कनिग्गयपभावलद्धसदा समत्तभरहाहिवा नरिंदा ससेलवणकाणणं च हिमवंतसागरंतं धीरा भुत्तूण

भरहवासं जियसत्तु पवररायसीहा पुबकडतवप्पभावा निविट्टसंचियसुहा अणेगवाससयमायुवंतो भज्जाहि य जणवयप्पहाणाहिं लालियंता अतुलसदफरिसरसरूवगंधे य अणुभवेत्ता (न्ता) तेवि उवणमंति मरणधम्मं अवितत्ता कामाणं। भुज्जो भुज्जो बलदेववांसुदेवा य पवरपुरिसा महाबलपरक्कमा महाधणुवियट्टका महासत्तसागरा दुद्धरा धणुद्धरा नरवसभा रामकेसवा भायरो सुपुरिसा वसुदेवसमुद्विजयमादियदसाराणं पज्जुन्नपतिवसंबअनिरुद्धनिसहउम्मुयसारणगयसुमुहदुम्मुहादीण जायवाणं अद्धुट्टाणवि कुमारकोडीणं हिययदयिया देवीए रोहिणीए देवीए देवकीए य आणंदहिययभावनंदणकरा सोलसरायवरसहस्साणुजातमग्गा सोलसदेवीसहस्सवरणयणहिययदइया णाणामणिकणगरयणमोत्तियपवालधणधन्नसंचयरिद्धिसमिद्धको- सा हयगयरहसहस्ससामी गामागरनगरखेडकब्बडमडंबदोणमुहपट्टाणसमसंबाहसहस्सथिमियणिव्वयपमुदितजणविविहसासनिप्फज्जमाणमेइणिसरसरियतलागसेलकाणणआरामुज्जाण- मणाभिरामपरिमंडियस्स दाहिणइडवेयइडगिरिविभत्तस्स लवणंजलहिपरिगयस्स छव्विहकालगुणकामजुत्तस्स अद्धभरहस्स सामिका धीरकित्तिपुरिसा ओहबला अइबला अनिहया अपराजियसत्तुमदणरिपुसहस्समाणमहणा साणुक्कोसा अमच्छरी अचवला अचंडा मितमंजुलपलावा हसियगंभीरमहुरभणिया (महुरपरिपुण्णसच्चवयणा पा०) अब्भुवगयवच्छला सर- ण्णा लक्खणवंजणगुणोववेया माणुम्माणपमाणपडिपुन्नसुजायसवंगसुंदरंगा ससिसोमागारकंतपियदंसणा अमरिसपा पयंडडंडप्पयारगंभीरदरिसणिज्जा तालद्धउव्विद्धगरुलकेऊ बलवग- गज्जंतदरितदप्पितमुट्टियचाणूरमूरगा रिट्टवसभघातिणो केसरिमुहविप्फाडगा दरितनागदप्पमहणा जमलज्जुणभंजगा महासउणिपूतणारिवू कंसमउडमोडगा जरासिंधमाणमहणा तेहि य (अब्भपडलपिंगलुज्जलेहिं पा०) अविरलसमसहियचंडमंडलसमप्पभेहिं (मंगलसयभत्तिच्छेयचित्तियखिंखिणिमणिहेमजालविइयपरिगयपेरंतकणयघंटियपयलियखिणिखिणितसुम- हुरसुइसुहसदालसोहिएहिं सपयरगमुत्तदामलम्बन्तभूसणेहिं नरिंदवामप्पमाणरुंदपरिमंडलेहिं सीयायववायवरिसविसदोसणासेहिं तमरयमलबहुलपडलधाडणपहारेहिं मुद्धसुहसियच्छा- यसमणुबद्धेहिं वयरामयवत्थिणिउणजोइयअडसहस्सवरकंचणसलागनिम्मिएहिं सुविमलरययसुट्टुच्छइएहिं णिउणोवियमिसिमिसित्तमणिरयणसूरमंडलवित्तिमिरकरनिग्गयपडिहय- पुणरविपच्चोवयंतचंचलमरीइकवयं विणिम्मुयंतेहिं पा०) सूरमिरीयकवयं विणिम्मुयंतेहिं सपतिदंडेहिं आयवत्तेहिं धरिज्जंतेहिं विरायंता ताहि य पवरगिरिकुहरविहरणसमुट्टियाहिं निरु- वहयचमरपच्छिमसरीरसंजाताहिं अमइलसियकमलविमुकुलुज्जलितरयतगिरिसिहरविमलससिकिरणसरिसकलहोयनिम्मलाहिं पवणाहयचवलचलियसललियपणच्चियवीइपसरियखीरो- दगपवरसागरूपूरचंचलाहिं माणससरपसरपरिचियावासविसदवेसाहिं कणगगिरिसिहरसंसिताहिं ओवाउप्पातचवलजयिणसिग्घवेगाहिं हंसवधूयाहिं चेव कलिया नाणामणिकणगमह- रिहतवणिज्जुज्जलविचित्तडंडाहिं सललियाहिं नरवतिसिरिसमुदयप्पगासणकरीहिं वरपट्टणुग्गयाहिं समिद्धरायकुलसेवियाहिं कालागुरुपवरकुंदुरुक्कतुरुक्कधूववरवासविसदगंधुद्धुयाभिरामा- हिं चिल्लिकाहिं उभयोपासंपि चामराहिं उक्खिप्पमाणाहिं सुहसीतलवातवीतियंगा अजिता अजितरहा हलमुसल(कणग पा०)पाणी संखचक्कगयसत्तिणंदगधरा पवरुज्जलसुकंतविम- लकोथूभतिरीडधारी कुंडलउज्जोवियाणणा पुंडरीयणयणा एगावलीकंठरतियवच्छा सिरिवच्छसुलंछणा वरजसा सबोउयसुरभिकुसुमसुरइयपलंबसोहंतवियसंतचित्तवणमालरतियवच्छा (प्र० लक्खणवंजणगुणोववेया) अट्टसयविभत्तलक्खणपसत्थसुंदरविराइयंगमंगा मत्तगयवरिंदललियविक्रमविलसियगती कडिसुत्तगनीलपीतकोसिज्जवाससा पवरदित्ततेया सारयनवथ- णियमहुरगंभीरनिद्धघोसा नरसीहा सीहविक्रमगई अत्थमियपवररायसीहा सोमा बारवइपुन्नचंदा पुबकयतवप्पभावा निविट्टसंचियसुहा अणेगवाससयमायुवंतो भज्जाहि य जणवय- प्पहाणाहिं लालियंता अतुलसदफरिसरसरूवगंधे अणुभवेत्ता (न्ता) तेवि उवणमंति मरणधम्मं अवितत्ता कामाणं। भुज्जो मंडलियनरवरेंदा सबला सअंतेउरा सपरिसा सपुरोहियामच्चदंडना- यकसेणावतिमंतनीतिकुसला नाणामणिरयणविपुलधणधन्नसंचयनिहीसमिद्धकोसा रज्जसिरिं विपुलमणुभविता (न्ता) विक्कोसंता बलेण मत्ता तेवि उवणमंति मरणधम्मं अवितत्ता कामाणं, भुज्जो उत्तरकुरुदेवकुरुवणविवरपादचारिणो नरगणा भोगुत्तमा भोगलक्खणधरा भोगसस्सिरीया पसत्थसोमपडिपुण्णरूवदरसणिज्जा सुजातसवंगसुंदरंगा रत्तुप्पलपत्तकंतकरचरणको- मलतला सुपइट्टियकुम्मचारुचलणा अणुपुबसुसंहयं(जायपवरं पा०)गुलीया उन्नयतणुतंबनिद्धनखा संठितसुसिलिडूढगोंफा एणीकुरुविंदावत्तवट्टाणुपुव्विजंधा समुग्गनिमग्गगूढजाणू वरवारणमत्ततुल्लविक्रमविलासितगती वरतुरगसुजायगुज्झदेसा आइन्नहयव निरुवलेवा पमुइयवरतुरगसीहअतिरेगवट्टियकडी गंगावत्तदाहिणावत्ततरंगभंगुररविकिरणबोहियविकोसायं- तपम्हगंभीरविगडनाभी साहतसोणंदमुसलदप्पणनिगरियवरकणगच्छरुसरिसवरवइरवलियमज्झा उज्जुगसमसहियजच्चतणुकसिणणिद्धआदेज्जलडहसूमालमउयरोमराई झसविहगसुजा- तपीणकुच्छी झसोदरा पम्हविगडनाभा संनतपासा संगयपासा सुंदरपासा सुजातपासा मितमाइयपीणरइयपासा अकरंदुयकणगरुयगनिम्मलसुजायनिरुवहयदेहधारी कणगसिलात- लपसत्थसमतलउवइयविच्छिन्नपिहुलवच्छा जुयसंनिभपीणरइयपीवरपउट्टसंठियसुसिलिडूविसिडलडसुनिचितधणथिरसुबद्धसंधी पुरवरवरफलिहवट्टियभुया भुयईसरविपुलभोगआयाण-

फलिउच्छुद्धदीहबाहू रत्ततलोवतियमउयमंसलसुजायलक्खणपसत्थअच्छिदजालपाणी पीवरसुजायकोमलवरंगुली तंबतलिणसुइरुइलनिद्धणक्खा निद्धपाणिलेहा चंदपाणिलेहा सूरपा-
णिलेहा संखपाणिलेहा चक्कापाणिलेहा दिसासोवत्थियपाणिलेहा रविससिसंखवरचक्कादिसासोवत्थियविभत्तसुविरइयपाणिलेहा वरमहिसवराहसीहसददूलसिंहनागरवरपडिपुन्नविउल-
खंधा चउरंगुलसुप्पमाणकंबुवरसरिसग्गीवा अवट्टियसुविभत्तचित्तमंसू उवचियमंसलपसत्थसददूलविपुलहणुया ओयवियसिलप्पवालबिंबफलसंनिभाधरोट्टा पंडुरससिसकलविमलसं-
खगोखीरफेणकुंददगरयमुणालियाधवलदंतसेढी अखंडदंता अप्फुडियदंता अविरलदंता सुणिद्धदंता सुजायदंता एगदंतसेढिअ अणेगदंता हुयवहनिद्धंतधोयतत्ततवणिजरत्ततलता-
लुजीहा गरुलायतउज्जुतुंगनासा अवदालियपोंडरीयनयणा कोकासियधवलपत्तलच्छा आणामियचावरुइलकिण्हभराजिसंठियसंगयाययसुजायभुमगा अह्ठीणपमाणजुत्तसवणा सुस-
वणा पीणमंसलकवोलदेसभागा अचिरुगयबालचंदसंठियमहानिडाला उडुवतिरिव पडिपुन्नसोमवयणा छत्तागारुत्तमंगदेसा घणनिचियसुबद्धलक्खणुन्नयकूडागारनिभपिंडियग्गसिरा
हुयवहनिद्धंतधोयतत्ततवणिजरत्तकेसंतकेसभूमी सामलीपोंडघणनिचियछोडियमिउविसतपसत्थसुहुमलक्खणसुगंधिसुंदरभुयमोयगभिंङ्गीलकज्जलपहट्टभमरगणनिद्धनिगुरुंबनिचिय-
कुंचियपयाहिणावत्तमुद्धया सुजातसुविभत्तसंगयंगमंगा लक्खणवज्जणगुणोववेया पसत्थवत्तीसलक्खणधरा हंसस्सरा कुंचस्सरा दुंदुभिस्सरा सीहस्सरा वग्घ(ओघ)सरा मेघसरा सुस्सरा
सुस्सरनिग्घोसा वज्जरिसहनारायसंघयणा समचउरंससंठाणसंठिया छायाउज्जोवियंगमंगा पसत्थच्छवी निरातंका कंकग्गहणी कवोतपरिणामा सगुणिपोसपिट्ठंतोरुपरिणया पउमुप्पलस-
रिसगंधुस्साससुरभिवयणा अणुलोमवाउवेगा अवदायनिद्धकाला विग्गहियउन्नयकुच्छी अमयरसफलाहारा तिगाऊयसमूसिया तिपलिओवमट्टितीका तिन्नि य पलिओवमाइं परमाउं
पालयित्ता तेवि उवणमंति मरणधम्मं अवितित्ता कामाणं, पमयावि य तेसिं होंति सोम्मा सुजायसवंगसुंदरीओ पहाणमहिलागुणेहिं जुत्ता अतिकंतविसप्पमाणमउयसुकुमालकुम्मसं-
ठियविसिद्धिसिलिद्धचलणा उज्जुमउयपीवरसुसाहतंगुलीओ अब्भुन्नतरतिततलिणतंबसुइनिद्धनखा रोमरहियवट्टसंठियअजहन्नपसत्थलक्खणअकोप्पजंघजुयला सुणिम्मिसुनिगूढजाणू
मंसलपसत्थसुबद्धसंधी कयलीखंभातिरेकसंठियनिव्वणसुकुमालमउयकोमलअविरलसमसहितसुजायवट्टपीवरनिरन्तरोरू अट्टावयवीइपट्टसंठियपसत्थविच्छिन्नपिहुलसोणी वयणायाम-
प्पमाणदुगुणियविसालमंसलसुबद्धजहणवरधारिणीओ वज्जविराइयपसत्थलक्खणनिरोदरीओ तिवलिवलियतणुनमियमज्झियाओ उज्जुयसमसहियजच्चतणुकसिणनिद्धआदेज्जलडहसु-
कुमालमउयसुविभत्तरोमरातीओ गंगावत्तगपदाहिणावत्ततरंगभंगरविकिरणतरुणबोधितआकोसायंतपउमगंभीरविगडनाभा अणुब्भडपसत्थसुजातपीणकुच्छी सन्नतपासा सुजातपासा
संगतपासा मियमायियपीणरतितपासा अकरंदुयकणगरुयगनिम्मलसुजायनिरुवहयगायलट्टी कंचणकलसपमाणसमसहियलट्टुचुचुयआमेलगजमलजुयलवट्टियपओहराओ भुयंगअणु-
पुव्वतणुयगोपुच्छवट्टसमसहियनमियआदेज्जलडहबाहा तंबनहा मंसलगहत्था कोमलपीवरवरंगुलीया निद्धपाणिलेहा ससिसूरसंखचक्कावरसोत्थियविभत्तसुविरइयपाणिलेहा पीणुणयक-
क्खवत्थिप्पदेसपडिपुन्नगलकवोला चउरंगुलसुप्पमाणकंबुवरसरिसग्गीवा मंसलसंठियपसत्थहणुया दालिमपुप्फप्पगासपीवरपलंबकुंचितवराधरा सुंदरोत्तरोट्टा दधिदगरयकुंदचंदवासंति-
मउलअच्छिदविमलदसणा रत्तुप्पलपउमपत्तसुकुमालतालुजीहा कणवीरमुउलऽकुडिलऽब्भुन्नयउज्जुतुंगनासा सारदनवकमलकुमुतकुवलयदलनिगरसरिसलक्खणपसत्थअजिम्हकंत-
नयणा आनामियचावरुइलकिण्हभराइसंगयसुजायतणुकसिणनिद्धभुमगा अह्ठीणपमाणजुत्तसवणा सुस्सवणा पीणमट्टगंडलेहा चउरंगुलविसालसमनिडाला कोमुदिरयणिकरविम-
लपडिपुन्नसोमवदणा छत्तुन्नयउत्तमंगा अकविलसुसिणिद्धदीहसिरया छत्तज्झयजूवथूभदामिणिकमंडलुकलसवाविसोत्थियपडागजवमच्छकुम्मरथवरमकरज्झयअंकथालअंकुसअट्टाव-
यसुपइट्टअमरसिरियाभिसेयतोरणमेइणिउदधिवरपवरभवणगिरिवरवरायंससललियगयउसभसीहचामरपसत्थवत्तीसलक्खणधरीओ हंससरिच्छगतीओ कोइलमहुरगिराओ कंता सव्वस्स
अणुमयाओ ववगयवलिपलितवंगदुव्वन्नवाधिदोहग्गसोयमुक्काओ उच्चत्तेण य नराण थोवूणमूसियाओ सिंगारागारचारुवेसाओ सुंदरथणजहणवयणकरचरणणयणा लावन्नरूवजोव्वणगु-
णोववेया नंदणवणविवरचारिणीओ व अच्छराओ उत्तरकुरुमाणुसच्छराओ अच्छेरगपेच्छणिज्जियाओ तिन्नि य पलिओवमाइं परमाउं पालयित्ता ताओऽवि उवणमंति मरणधम्मं
अवितित्ता कामाणं । १५ । मेहुणसन्नासंपगिद्धा य मोहभरिया सत्थेहिं हणंति एकमेकं विसयविसउदीरएसु, अवरे परदारेहिं हम्मंति विमुणिया धणनासं सयणविप्पणासं च पाउणंति
परस्स दाराओ जे अविरया, मेहुणसन्नसंपगिद्धा य मोहभरिया अस्सा हत्थी गवा य महिसा मिगा य मारेंति एकमेकं, मणुयगणा वानरा य पक्खी य विरुज्झंति, मित्ताणि खिप्पं
भवन्ति सत्तू, समये धम्मे गणे य भिंदंति पारदारी, धम्मगुणरया य बंभयारी खणेण उल्लोट्टए चरित्ताओ जसमन्तो सुव्वया य पावेंति अ(जस पा०)किंति रोगत्ता वाहिया पवड्ढंति
रोयवाही, दुवे य लोया दुआराहगा भवन्ति इहलोए चेव परलोए चेव परस्स दारओ जे अविरया, तहेव केई परस्स दारं गवेसमाणा गहिया हया य बद्धरुद्धा य एवं जाव गच्छंति विपुलमो-

हाभिभूयसन्ना मेहुणमूलं च सुव्रए तत्थ २ वत्तपुव्वा संगामा जणक्खयकरा सीयाए दोवईए कए रुपिणीए पउभावईए ताराए कंचणाए रत्तसुभद्दाए अहिहियाए सुवन्नगुलियाए किन्नरीए सुरूबविज्जुमतीए रोहिणीए य अन्नेसु य एवमादिएसु बहवो महिलाकएसु सुव्रंति अइकंता संगामा गामधम्ममूला इहलोए ताव नट्टा परलोएवि य णट्टा महया मोहतिमि-
संधकारे घोरे तसथावरसुहुमबादरेसु पज्जत्तमपज्जत्तसाहारणसरीरपत्तेयसरीरेसु य अंडजपोतजजराउयरसजसंसेइमसंमुच्छिमउब्भियउववादिएसु य नरगतिरियदेवमाणुसेसु जरामरण-
रोगसोगबहुले पलिओवमसागरोवमाइं अणादीयं अणवदग्गं दीहमद्धं चाउरंतसंसारकंतारं अणुपरियट्ठंति जीवा मोहवससंनिविट्ठा, एसो सो अबंभस्स फलविवागो इहलोइओ पारलो-
इओ य अप्पसुहो बहुदुक्खो महब्भओ बहुरयप्पगाढो दारुणो कक्कसो असाओ वाससहस्सेहिं मुच्चती, न य अवेदइत्ता अत्थि हु मोक्खोत्ति एवमाहंसु, नायकुलनंदणो महप्पा जिणो
उ वीरवरनामधेज्जो कहेसी य अबंभस्स फलविवागं एयं, तं अबंभंपि चउत्थं सदेवमणुयासुरस्स लोणस्स पत्थणिज्जं एवं चिरपरिचियमणुगयं दुरंतं चउत्थं अधम्मदारं समत्तंतिवेमि
। १६ ॥ दारं ४ ॥ जंबू ! इत्तो परिग्गहो पंचमो उ नियमा णाणामणिकणगरयणमहरिहपरिमलसपुत्तदारपरिजणदासीदासभयगपेसहयगयगोमहिसउट्ठवरअयगवेलगसीयासगडरहजाण-
जुग्गसंदणसयणासणवाहणकुवियधणधन्नपाणभोयणाच्छायणगंधमल्लभायणभवणविहिं चेव बहुविहीयं भरहं णगणगरणियमजणवयपुरवरदोणमुहखेडकब्बडमडंबसंवाहपट्ठणसहस्स-
परिमंडियं थिमियमेइणीयं एगच्छत्तं ससागरं भुंजिऊण वसुहं अपरिमियमणंततण्हमणुगयमहिच्छसारनिरयमूलो लोभकलिकसायमहक्खंधो चिंतासयनिचियविपुलसालो गारवपवि-
रहियग्गविडवो नियडितयापत्तपल्लवधरो पुप्फफलं जस्स कामभोगा आयासविसूरणाकलहपकंपियग्गसिहरो नरवतिसंपूजितो बहुजणस्स हिययदइओ इमस्स मोक्खवरमोत्तिमग्गस्स
फलहभूओ चरिमं अहम्मदारं । १७ । तस्स य नामाणि इमाणि गोण्णाणि होंति तीसं, तं०-परिग्गहो संचयो चयो उवचओ निहाणं संभारो संकरो आयरो पिंडो दव्वसारो १० तहा
महिच्छा पडिबंधो लोहप्पा मह(प्र० परिब्रआ)इ(द्धी पा०) उवकरणं संरक्खणा य भारो संपाउप्पायको कलिकरंडो पवित्थरो २० अणत्थो संथवो अगुत्ती आयासो अवियोगो अमुत्ती
तण्हा अणत्थको आसत्ती असंतोसोत्तिविय ३०, तस्स एयाणि एवमादीणि नामधेज्जाणि होंति तीसं । १८ । तं च पुण परिग्गहं ममायंति लोभघत्था भवणवरविमाणवासिणो परिग्ग-
हरुत्ती परिग्गहे विविहकरणबुद्धी देवनिकाया य असुरभुयगगरुलसुवण्णविज्जुजलणदीवउदहिदिसिपवणथणियअणवंनियपणवंनियइसिवातियभूतवाइयकंदियमहाकंदियकुहंडपतंगदेवा
पिसायभूयजक्खवरक्खसकिंनरकिंपुरिसमहोरगगंधवा य तिरियवासी पंचविहा जोइसिया य देवा बहस्सतीचंदसूरसुक्कसनिच्छरा राहुधूमकेउबुधा य अंगारका य तत्ततवणिज्जकणयवण्णा
जे य गहा जोइसम्मि चारं चरंति केऊ य गतिरतीया अट्टावीसतिविहा य नक्खत्तदेवगणा नाणासंठाणसंठियाओ य तारगाओ ठियलेस्सा चारिणो य अविस्साममंडलगती उवरिचरा
उड्ढलोगवासी दुविहा वेमाणिया य देवा सोहम्मीसाणसणंकुमारमाहिंदबंभलोगलंतगमहासुक्कसहस्सारआणयपाणयआरणअचुया कप्पवरविमाणवासिणो सुरगणा गेवेज्जा अणुत्तरा
दुविहा कप्पातीया विमाणवासी महिडिडका उत्तमा सुरवरा एवं च ते चउब्रिहा सपरिसावि देवा ममायंति भवणवाहणजाणविमाणसयणासणाणि य नाणाविहवत्थभूसणा पवरपहर-
णाणि य नाणामणिपंचवन्नदिद्वं च भायणविहिं नाणाविहकामरूवे वेउद्वितअच्छरगणसंघाते दीवसमुदे दिसाओ विदिसाओ चेतियाणि वणसंडे पव्वते य गामनगराणि य आरामु-
ज्जाणकाणणाणि य कूवसरतलागवाविदीहियदेवकुलसभप्पवावसहिमाइयाइं बहुकाइं कित्तणाणि य परिगेण्हित्ता परिग्गहं विपुलदव्वसारं देवावि सइंदगा न तित्ति न तुट्ठिं उवलभंति
अच्चंतविपुललोभाभिभूतसत्ता वासहरइक्खुगारवट्ठपव्वयकुंडलरुचगवरमाणुसोत्तरकालोदधिलवणसलिलदहपतिरतिकरअंजणकसेलदहिमुहऽवपातुप्पायकंचणकचित्तविचित्तजमकवरसि-
हरकूडवासी वक्खारअकम्मभूमिसु सुविभत्तभागदेसासु कम्मभूमिसु, जेऽवि य नरा चाउरंतचक्कवट्ठी बासुदेवा बलदेवा मंडलीया इस्सरा तलवरा सेणावती इब्भा सेट्ठी रट्टिया पुरोहिया
कुमारा दंडणायगा माडंबिया मत्थवाहा कोडुंबिया अमच्चा एए अन्ने य एवमाती परिग्गहं संचिणंति अणंतं असरणं दुरंतं अधुवमणिच्चं असासयं पावकम्मनेम्मं अवकिरियव्वं विणासमूलं
वहबंधपरिकिलेसबहुलं अणंतसकिलेसकारणं, ते तं धणकणगरयणनिचयं पिंडिता चेव लोभघत्था संसारं अतिवयंति सब्बदुक्ख(प्र० भय)संनिलयणं, परिग्गहस्सेव य अट्टाए सिप्पसयं
सिक्खए बहुजणो कलाओ य बावत्तरिं सुनिपुणाओ लेहाइयाओ सउणरुयावसाणाओ गणियप्पहाणाओ चउसट्ठिं च महिलागुणे रत्तिजणणे सिप्पसेवं असिमसिकिसिवाणिज्जं ववहारं
अत्थइसत्थच्छरुप्पवायं विविहाओ य जोगजुंजणाओ अन्नेसु एवमादिएसु बहूसु कारणसएसु जावजीवं नडिज्जए संचिणंति मंदबुद्धी, परिग्गहस्सेव य अट्टाए करंति पाणाण वहकरणं
अलियनियडिस्सइसंपओगे परदव्वअभिज्जा सपरदारअभिगमणासेवणाए आयासविसूरणं कलहभंडणवेराणि य अवमाणणविमाणणाओ इच्छामहिच्छप्पिवाससतततिसिया तण्हगेहि-
लोभघत्था अत्ताणा अणिग्गहिया करंति कोहमाणमायालोभे अकित्तणिज्जे परिग्गहे चेव होंति नियमा सल्ला दंडा य गारवा य कसाया सन्ना य कामगुणअण्हवगा इंदियलेसाओ सय-
णसंपओगा सचित्ताचित्तमीसगाइं दव्वाइं अणंतकाइं इच्छंति परिघेत्तुं सदेवमणुयासुरम्मि लोए लोभपरिग्गहो जिणवरेहिं भणिओ नत्थि एरिसो पासो पडिबंधो अत्थि सब्ब- (१३२)

तदेहं च फासुयं च न निसिज्जकहापओयणक्खासु ओवणीयंति न तिगिच्छामंतमूलभेसज्जकज्जेहं न लक्खणुप्पायसुमिणजोइसनिमित्तकहप्पउत्तं नवि डंभणाए नवि रक्खणाते नवि सासणाते नवि दंभणरक्खणसासणाते भिक्खं गवेसियं नवि वंदणाते नवि माणणाते नवि पूयणाए नवि वंदणमाणणपूयणाते भिक्खं गवेसियं नवि हीलणाते नवि निंदणाते नवि गरहणाते नवि हीलणनिंदणगरहणाते भिक्खं गवेसियं नवि भेसणाते नवि तज्जणाते नवि तालणाते नवि भेसणतज्जणतालणाते भिक्खं गवेसियं नवि गारवेणं नवि कुह(प्र० प्प) -
 णयाते नवि वणीमयाते नवि गारवकुह(प्र० प्प)वणीमयाए भिक्खं गवेसियं नवि मित्तयाए नवि पत्थणाए नवि सेवणाए नवि मित्तपत्थणसेवणाते भिक्खं गवेसियं अन्नाए अगट्टिए अदुट्टे अदीणे अविमणे अकलुणे अविसाती अपरितंतजोगी जयणघडणकरणचरियविणयगुणजोगसंपउत्ते भिक्खू भिक्खेसणाते निरते, इमं च णं सब्बजीवरक्खणदयट्ठाते पावयणं भगवया सुकहियं अत्तहियं पेच्चाभावियं आगमेसिभदं सुद्धं नेयाउयं अकुडिलं अणुत्तरं सब्बदुक्खपावाण विउवसमणं । २२ । तस्स इमा पंच भावणातो पढमस्स वयस्स होंति पाणाति-
 वायवेरमणपरिरक्खणट्ठयाए पढमं ठाणगमणगुणजोगजुंजणजुगंतरनिवातियाए दिट्ठीए ईरियं कीडपयंगतसथावरदयावरेण निच्चं पुप्फफलतयपवालकंदमूलदगमट्ठियबीजहरियपरिव-
 ज्जिएण संमं, एवं खलु सब्बपाणा न हीलियद्वा न निंदियद्वा न गरहियद्वा न हिंसियद्वा न छिंदियद्वा न भिंदियद्वा न वहेयद्वा न भयं दुक्खं च किंचि लब्भा पावेउं एवं ईरियासमिति-
 जोगेण भावितो भवति अंतरप्पा असबलमसंकिलिट्ठनिव्वणचरित्तभावणाए अहिंसए संजए सुसाहू, बितीयं च मणेण अपावएणं, पावकं अहम्मियं दारुणं निस्संसं वहबंधपरिकिलेस्सबहुलं जरा(भय पा०)मरणपरिकिलेससंकिलिट्ठं न कयावि मणेण पावतेणं पावगं किंचिवि झायं एवं मणसमितिजोगेण भावितो भवति अंतरप्पा असबलमसंकिलिट्ठनिव्वणचरित्तभावणाए
 अहिंसए संजए सुसाहू, ततियं च वर्तीते अपावियाते (प्र० अहम्मियं दारुणं नीसंसं वहबंधपरिकिलेससंकिलिट्ठं न कयाइ वईए पावियाए) पावकं न किंचिवि भासियं एवं वतिसमिति-
 जोगेण भावितो भवति अंतरप्पा असबलमसंकिलिट्ठनिव्वणचरित्तभावणाए अहिंसओ संजओ सुसाहू, चउत्थं आहारएसणाए सुद्धं उच्छं गवेसियं अन्नाए (अगट्टिते पा०)(प्र० अगिद्धे)
 अदुट्टे अदीणे (प्र० अविमणे) अकलुणे अविसादी अपरितंतजोगी जयणघडणकरणचरियविणयगुणजोगसंपओगजुत्ते भिक्खू भिक्खेसणाते जुत्ते समुदाणेऊण भिक्खचरियं उच्छं
 घेतूण आगतो गुरुजणस्स पासं गमणागमणातिचारे पडिक्कमणपडिक्कंते आलोयणदायणं च दाऊण गुरुजणस्स गुरुसंदिट्ठस्स वा जहोवएसं निरइयारं च अप्पमत्तो, पुणरवि अणेसणाते
 पयतो पडिक्कमित्ता पसंते आसीणसुहनिसत्ते मुहुत्तमेत्तं च झाणसुहजोगनाणसज्झायगोवियमणे धम्ममणे अविमणे सुहमणे अविग्गहमणे समाहियमणे सद्धासंवेगनिज्जरमणे पवतण-
 वच्छल्लभावियमणे उट्टेऊण य पहट्टुट्टे जहारायणियं निमंतइत्ता य साहवे भावओ य विइण्णे य गुरुजणेणं उपविट्टे संपमज्जिऊण ससीसं कायं तहा करतलं अमुच्छित्ते अगिद्धे अग-
 ट्टिए अगरहिते अणज्झोववण्णे अणाइले अकुद्धे अणत्तट्टिते असुरसुरं अचवचवं अदुतमविलंबियं अपरिसाडिं आलोयभायणे जयं पय(प्र० जयमप्पम)त्तेण ववगयसंजोगमणिंगालं च
 विगयधूमं अक्खोवंजणाणुलेवणभूयं संजमजायामायानिमित्तं संजमभारवहणट्ठयाए भुंजेज्जा (प्र० भोत्तवं) पाणधारणट्ठयाए संजएण समियं एवं आहारसमितिजोगेण भाविओ
 भवति अंतरप्पा असबलमसंकिलिट्ठनिव्वणचरित्तभावणाए अहिंसए संजए सुसाहू, पंचमं आदाणनिकखेवणासमिई पीढफलगसिज्जासंधारगवत्थपत्तकंबलदंडगरयहरणचोलपट्टगमुहपो-
 त्तिगपायपुञ्छणादी एयंपि संजमस्स उववूहणट्ठयाए वातातवदंसमसगसीयपरिरक्खणट्ठयाए उवगरणं रागदोसरहितं परिहरित्तं संजमेणं निच्चं पडिलेहणपप्फोडणपमज्जणाए अहो य
 राओ अ अप्पमत्तेणं होइ सययं निक्खिवियं च गिण्हियं च भायणभंडोवहिउवगरणं एवं आयाणभंडनिकखेवणासमितिजोगेण भाविओ भवति अंतरप्पा असबलमसंकिलिट्ठनिव्वणच-
 रित्तभावणाए अहिंसए संजते सुसाहू, एवमिणं संवरस्स दारं सम्मं संवरियं होति सुप्पणिहियं इमेहिं पंचहिवि कारणेहिं मणवयणकायपरिरक्खिएहिं णिच्चं आमरणंतं च एस जोगो
 णेयवो धितिमया मतिमया अणासवो अकलुसो अच्छिद्धो (प्र० अपरिस्सावी) असंकिलिट्ठो सुद्धो सब्बजिणमणुत्तातो, एवं पढमं संवरदारं फासियं पालियं सोहियं तीरियं किट्टियं
 आराहियं आणाते अणुपालियं भवति, एयं नायमुणिणा भगवया पन्नवियं परूवियं पसिद्धं सिद्धं सिद्धवरसासणमिणं आघवितं सुदेसितं पसत्थं पढमं संवरदारं समत्तंतिबेमि । २३ ॥
 संवरदारं १ (६) ॥ जंबू ! बितियं च सच्चवयणं सुद्धं सुचियं सिवं सुजायं सुभासियं सुवयं सुकहियं सुदिट्ठं सुपतिट्टियं सुपइट्टियजसं सुसंजभियवयणबुइयं सुरवरनरवसभपवरबलवगसुविहिय-
 जणबहुमयं परमसाहुधम्मचरणं तवनियमपरिग्गहियं सुगतिपहदेसकं च लोगुत्तमं वयमिणं विज्जाहरगगणगमणविज्जाण साहकं सग्गमग्गसिद्धिपहदेसकं अवितहं तं सच्चं उज्जुयं अकु-
 डिलं भूयत्थं अत्थतो विसुद्धं उज्जोयकरं पभासकं भवति सब्बभावान जीवलोगे अविसंवादि जहत्थमधुरं पच्चक्खं दयिवयं व जं तं अच्छेरकारकं अवत्थंतरेसु बहुएसु माणुसाणं सच्चेण
 महासमुद्धमज्जेवि चिट्ठंति न निमज्जंति मूढाणियावि पोया सच्चेण य उदगसंभमंमिवि न वुज्झन्ति न य मरंति थाहं ते लभंति सच्चेण य अगणिसंभमंमिवि न डज्झंति उज्जुगा मणूसा

सच्चेण य तत्ततेल्लतउलोहसीसकाइं छिवंति धरेंति न य डज्झंति मणूसा पच्चयकडकाहिं मुच्चंते न य मरंति सच्चेण य परिग्गहीया असिपंजरगया लुट्ठंति समराओवि णिइंति अणहा य सच्चवादी वहबंधभियोगवेरघोरेहिं पमुच्चंति य अमित्तमज्झाहिं नियंति अणहा य सच्चवादी सादेव्वाणि (प्र० सण्णज्झाणिवि) य देवयाओ करेंति सच्चवयणे रताणं. तं सच्चं भगवं नित्थकरमुभासियं दसविहं चोइसपुब्बीहिं पाहुडत्थविदितं महरिसीण य समयप्पदिन्नं (महरिसिसमयपडन्नचिन्तं पा०) देविंदनरिंदभासियत्थं वेमाणियसाहियं महत्थं मंतोसहिविज्जासाहणत्थं चारणग-मणसमणसिद्धविज्जं मणुयगणाणं वंदणिज्जं अमरगणाणं अच्चणिज्जं असुरगणाणं च पूयणिज्जं अणेगपासंडिपरिग्गहितं जं तं लोकंमि सारभूयं गंभीरतरं महासमुद्दाओ थिरतरगं मेरुपच्च-याओ सोमतरगं चंदमंडलाओ दित्ततरं सूरमंडलाओ विमलतरं सरयनहयलाओ सुरभितरं गंधमादणाओ जेविय लोगम्मि अपरिसेसा मंतजोगा जवा य विज्जा य जंभका य अत्थाणि य सत्थाणि य सिक्खाओ य आगमा य सत्थाणिवि ताइं सच्चे पइट्टियाइं. सच्चंपिय संजमस्स उवरोहकारकं किंचि न वत्तच्चं हिंसासावज्जसंपउत्तं भेयविकहकारकं अणत्थवायकल्लहकारकं अणत्थं वज्जं अव(प्र०आ)वायविवायसंपउत्तं वेलंबं ओजधेज्जबहुलं निल्लज्जं लोयगरहणिज्जं दुहिट्ठं दुस्सुयं अमुणियं अप्पणो थवणा परेसु निंदा न तंसि मेहावी ण तंसि धन्नो न तंसि पियधम्मो न तं कुलीणो न तंसि दाणवती न तंसि सूरु न तंसि पडिरूवो न तंसि लट्ठो न पंडिओ न बहुस्सुओ नवि य तं तवस्सी ण यावि परल्लोगणिच्छियमती सि सच्चकालं जातिकुल-रूववाहिरोगेण वावि जं होइ वज्जणिज्जं दुहिलं (पा० दुहओ)उवयारमतिकंतं एवंविहं सच्चंपि न वत्तच्चं, अह केरिसकं पुणाइं सच्चं तु भासियच्चं ? जं तं दव्वेहिं पज्जवेहि य गुणेहिं कम्ममेहिं बहुविहेहिं सिप्पेहिं आगमेहि य नामक्खायनिवाउवसग्गतद्वियसमाससंधिपदहेउजोगियउणादिकिरियाविहाणधातुसरविभत्तिवन्नजुत्तं तिकल्लं दसविहंपि सच्चं जह भणियं तह य कम्मणा होइ दुवालसविहा होइ भासा वयणंपिय होइ सोलसविहं, एवं अरहंतमणुच्चायं समिक्खियं संजएण कालंमि य वत्तच्चं । २४ । इमं च अल्लियपिसुणफरुसकडुयचवल्लवयणप-रिरक्खणट्टयाए पावयणं भगवया सुकहियं अत्तहियं पेच्चाभाविकं आगमेसिभदं सुद्धं नेयाउयं अकुडिलं अणुत्तरं सच्चदुक्खपावाणं विओसमणं, तस्स इमा पंच भावणाओ बितियस्स वयस्स अल्लियवयणस्स वेरमणपरिरक्खणट्टयाए पढमं सोऊणं संवरट्ठं परमट्ठं सुट्ठं जाणिऊण न वेगियं न तुरियं न चवलं न कडुयं न फरुसं न साहसं न य परस्स पीलाकरं सावज्जं सच्चं च हियं च मियं च गाहगं च सुद्धं संगयमकाहलं च समिक्खितं संजतेण कालंमि य वत्तच्चं, एवं अणुवीतिसमित्तजोगेण भाविओ भवति अंतरप्पा संजयकरचरणनयणवयणो सूरु सच्चज्जवसंपन्नो, बितियं कोहो ण सेवियच्चो, कुद्धो चंडिक्किओ मणूसो अल्लियं भणेज्ज पिसुणं भणेज्ज फरुसं भणेज्ज अल्लियं पिसुणं फरुसं भणेज्ज कल्लहं करेज्जा वेरं करेज्ज विकहं करेज्जा कल्लहं वेरं विकहं करेज्जा सच्चं हणेज्ज सीलं हणेज्ज विणयं हणेज्ज सच्चं सीलं विणयं हणेज्ज वेसो हवेज्ज वत्थुं भवेज्ज गम्मो भवेज्ज वेसो वत्थुं गम्मो भवेज्ज एयं अच्चं च एवमादियं भणेज्ज कोहग्गिसंपलित्तो तम्हा कोहो न सेवियच्चो, एवं खंतीइ भाविओ भवति अंतरप्पा संजयकरचरणनयणवयणो सूरु सच्चज्जवसंपन्नो, ततियं लोभो न सेवियच्चो, लुद्धो लोलो भणेज्ज अल्लियं खेत्तस्स व वत्थुस्स व कतेण, लुद्धो लोलो भणेज्ज अल्लियं कित्तीए लोभस्स व कएण, लुद्धो लोलो भणेज्ज अल्लियं रिद्धीय व सोक्खस्स व कएण, लुद्धो लोलो भणेज्ज अल्लियं भत्तस्स व पाणस्स व कएण, लुद्धो लोलो भणेज्ज अल्लियं पीढस्स व फल्लगस्स व कएण, लुद्धो लोलो भणेज्ज अल्लियं सेज्जाए व संथारकस्स व कएण, लुद्धो लोलो भणेज्ज अल्लियं वत्थस्स व पत्तस्स व कएण, लुद्धो लोलो भणेज्ज अल्लियं कंबलस्स व पायपुंल्लणस्स व कएण, लुद्धो लोलो भणेज्ज अल्लियं सीसस्स व सिस्सिणीए व कएण, लुद्धो लोलो भणेज्ज अल्लियं अच्चेसु य एवमा-दिएसु बहुसु कारणसतेसु, लुद्धो लोलो भणेज्ज अल्लियं तम्हा लोभो न सेवियच्चो, एवं मुत्तीय भाविओ भवति अंतरप्पा संजयकरचरणनयणवयणो सूरु सच्चज्जवसंपन्नो, चउत्थं न भाइयच्चं, भीतं खु भया अइंति लहुयं भीतो अबितिज्जओ मणूसो भीतो भूतेहिं धिप्पइ भीतो अच्चंपिहु भेसेज्जा भीतो तवसंजमंपिहु मुएज्जा भीतो य भरं न नित्थरेज्जा सप्पुरिसनिसेवियं च मग्गं भीतो न समत्थो अणुचरिउं तम्हा न भातियच्चं भयस्स वा वाहिस्स वा रोगस्स वा जराए वा मच्चुस्स वा अच्चस्स वा एगस्स वा (एवमादियस्स वा पा०) एवं धेज्जेण भाविओ भवति अंतरप्पा संजयकरचरणनयणवयणो सूरु सच्चज्जवसंपन्नो, पंचमकं हासं न सेवियच्चं, अल्लियाइं असंतकाइं जंपंति हासइत्ता परपरिभवकारणं च हासं परपरिवायप्पियं च हासं परपीला-कारणं च हासं भेदविमुत्तिकारकं च हासं अन्नोन्नजणियं च होज्ज हासं अन्नोन्नगमणं च होज्ज कम्मं कंदप्पाभियोगगमणं च होज्ज हासं आगुरियं किच्चिसत्तणं च जणेज्ज हासं तम्हा हासं न सेवियच्चं, एवं मोणेण भाविओ भवइ अंतरप्पा संजयकरचरणनयणवयणो सूरु सच्चज्जवसंपन्नो, एवमिणं संवरस्स दारं सम्मं संवरियं होइ सुप्पणिहियं इमेहिं पंचहिवि कारणेहिं मणवयणकायपरिरक्खएहिं निच्चं आमरणंतं च एस जोगो णेयच्चो धितिमया मतिमया अणासवो अकल्लुसो अच्छिदो अपरिस्सावी असंकि-लिट्ठो सुद्धो सच्चजिणमणुन्नाओ, एवं बितियं संवरदारं फासियं पालियं सोहियं तीरियं किट्टियं अणुपालियं आणाए आराहियं भवति, एवं नायमुणिणा भगवया पन्नवियं परूवियं पसिद्धं

सिद्धवरसासणमिणं आघवितं सुदेसियं पसत्थं बितियं संवरदारं समत्तंतिबेमि । २५ ॥ द्वारं २ (७) ॥ जंबू ! दत्तमणुण्णायसंवरो नाम होति ततियं सुव्वता ! महव्वतं गुणव्वतं परदव्वहरणपडि-
विरइकरणजुत्तं अपरिमियमणंततण्हाणुगयमहिच्छमणवयणकलुसआयाणसुनिग्गहियं सुसंजमियमणोहत्थपायनिभियं निग्गंथं नेट्टिकं निरुत्तं निरासवं निब्भयं विमुत्तं उत्तमनरवस-
भपवरबलवगसुविहितजणसंमतं परमसाहुधम्मचरणं जत्थ य गामागरनगरनिगमखेडकब्बडमडंबदोणमुहसंवाहपट्टणासमगयं च किंचि दव्वं मणिमुत्तिसिलप्पवालकंसदूसरययवरकण-
गरयणमादिं पडियं पम्हुट्टं विप्पणट्टं न कप्पति कस्सति कहेउं वा गेण्हिउं वा अहिरस्ससुवन्निकेण समलेट्ठुकंचणेणं अपरिग्गहसंवुडेणं लोणंमि विहरियव्वं, जंपिय होज्जाहि दव्वजातं
खलगतं खेत्तगतं रत्त(जलथलगयं खेत्त पा०)मंतरगतं वा किंचि पुप्फफलतयप्पवालकंदमूलतणकट्टसक्करादि अप्पं च बहुं च अणुं च थूलगं वा न कप्पति उग्गहंमि अदिण्णंमि गिण्हिउं
जे, हणि २ उग्गहं अणुन्नविय गेण्हियव्वं वज्जेयव्वो य सव्वकालं अचियत्तघरप्पवेसो अचियत्तभत्तपाणं अचियत्तपीढफलगसेज्जासंधारगवत्थपत्तकंबलदंडगरयहरणनिसेज्जचोलपट्टगमुहपो-
त्तियपायपुंछणाइ भायणभंडोवहिउवकरणं परपरिवाओ परस्स दोसो परववएसेणं जं च गेण्हइ परस्स नासेइ (सो) जं च सुकयं दाणस्स य अंतरातियं दाणविप्पणासो पेसुन्नं चैव मच्छ-
रितं च, जेविय पीढफलगसेज्जासंधारगवत्थपायकंबलमुहपोत्तियपायपुंछणादिभायणभंडोवहिउवकरणं असंविभागी असंगहरुती तवतेणे य वइतेणे य रूवतेणे य आयारे चैव भावतेणे
य सइकरे झञ्झकरे कलहकरे वेरकरे विकहकरे असमाहिकरे सया अप्पमाणभोती सततं अणुबद्धवेरे य निच्चरोसी से तारिसए नाराहए वयमिणं, अह केरिसए पुणाइ आराहए वयमिणं ?,
जे से उवहिभत्तपाणसंगहणदाणकुसले अच्चंतबालदुब्बलगिलाणवुड्डखमके पवत्तिआयरियउवज्झाए सेहे साहम्मिके तवस्सीकुलगणसंधचेइयट्टे य निजरट्टी वेयावच्चं अणिस्सियं दस-
विहं बहुविहं करेति, न य अचियत्तस्स गिहं पविसइ न य अचियत्तस्स गेण्हइ भत्तपाणं न य अचियत्तस्स सेवइ पीढफलगसेज्जासंधारगवत्थपायकंबलदंडगरयहरणनिसेज्जचोलपट्टय-
मुहपोत्तियपायपुंछणाइभायणभंडोवहिउवकरणं न य परिवायं परस्स जंपति ण यावि दोसे परस्स गेण्हति परववएसेणवि न किंचि गेण्हति न य विपरिणामेति कंचि जणं न यावि णासेति
दिन्नसुकयं दाऊण य न होइ पच्छाताविए संभागसीले संगहोवग्गहकुसले से तारिसते आराहते वयमिणं, इमं च परदव्वहरणवेरमणपरिक्खणट्टयाए पावयणं भगवया सुकहियं अत्त-
हितं पेच्चाभावितं आगमेसिभहं सुद्धं नेयाउयं अकुडिलं अणुत्तरं सव्वदुक्खपावाण विओसमणं, तस्स इमा पंच भावणातो ततियस्स वयस्स होंति परदव्वहरणवेरमणपरिक्खणट्टयाए,
पढमं देवकुलसभप्पवावसहरुक्खमूलआरामकंदरागरगिरिगुहाकम्मउज्जाणजाणसालाकुवितसालामंडवसुन्नघरसुसाणलेणआवणे अन्नंमि य एवमादियंमि दगमट्टियबीजहरिततसपा-
णअसंसत्ते अहाकडे फासुए विवित्ते पसत्थे उवस्सए होइ विहरियव्वं, आहाकम्मबहुले य जे से आसितसंमज्जिउस्सित्तसोहियछायण(प्र० छगण)दूमणलिंपणअणुलिंपणजलणभंडचा-
लणे अंतो बहिं च असंजमो जत्थ वट्ठती संजयाण अट्ठा वज्जेयव्वो हु उवस्सओ से तारिसए सुत्तपडिकुट्टे, एवं विवित्तवासवसहिसमितिजोगेण भावितो भवति अंतरप्पा निच्चं अहिकर-
णकरणकारावणपावकम्मविरतो दत्तमणुन्नायओग्गहरुती, बितियं आरामुज्जाणकाणणवणप्पदेसभागे जं किंचि इक्कडं व कट्ठिणगं च जंतुगं च परामेरकुच्चकुसडब्भपलालमूयगवक्कयपुप्फ-
फलतयप्पवालकंदमूलतणकट्टसक्करादी गेण्हइ सेज्जोवहिस्स अट्टे न कप्पए उग्गहे अदिन्नंमि गिण्हिउं जे हणि २ उग्गहं अणुन्नविय गेण्हियव्वं एवं उग्गहसमितिजोगेण भावितो भवति
अंतरप्पा निच्चं अहिकरणकरणकारावणपावकम्मविरते दत्तमणुन्नायओग्गहरुती, ततीयं पीढफलगसेज्जासंधारगट्टयाए रूक्खा न छिंदियव्वा नवि छेदणेण भेयणेण सेज्जा कारेयव्वा जस्सेव
उवस्सते वसेज्ज सेज्जं तत्थेव गवेसेज्जा न य विसमं समं करेज्जा न निवायपवायउस्सुगत्तं न डंसमसगेसु खुभियव्वं अग्गी धूमो न कायव्वो, एवं संजमबहुले संवरबहुले संवुडबहुले समा-
हिबहुले धीरे काएण फासयंतो सययं अज्झप्पज्झाणजुत्ते समिए एगे चरेज्ज धम्मं, एवं सेज्जासमितिजोगेण भावितो भवति अंतरप्पा निच्चं अहिकरणकरणकारावणपावकम्मविरते
दत्तमणुन्नायउग्गहरुती, चउत्थं साहारणपिंडपातलाभे भोत्तव्वं संजएणं समियं न सायसूयाहिकं न खद्धं ण वेगितं न तुरियं न चवलं न साहसं न य परस्स पीलाकरं सावज्जं तह भोत्तव्वं
जह से ततियवयं न सीदति साहारणपिंडवायलाभे सुहुमं अदिन्नादाण (विरमणवयनियमणं, वयनियमवेरमणं पा०) एवं साहारणपिंडवायलाभे समितिजोगेण भावितो भवति अंतर-
प्पा निच्चं अहिकरणकरणकारावणपावकम्मविरते दत्तमणुन्नायउग्गहरुती, पंचमगं साहम्मिए विणओ पउंजियव्वो उवकरणपारणासु विणओ पउंजियव्वो वायणपरियट्टणासु विणओ
पउंजियव्वो दाणगहणपुच्छणासु विणओ पउंजियव्वो निक्खमणपवेसणासु विणओ पउंजियव्वो अंनेसु य एवमादिसु बहुसु कारणसएसु विणओ पउंजियव्वो, विणओवि तवो तवोवि
धम्मो तम्हा विणओ पउंजियव्वो गुरूसु साहूसु तवस्सीसु य, एवं विणतेण भाविओ भवइ अंतरप्पा णिच्चं अधिकरणकरणकारावणपावकम्मविरते दत्तमणुन्नायउग्गहरुई, एवमिणं सं-
वरस्स दारं सम्मं संवरियं होइ सुपणिहियं एवं जाव आघवियं सुदेसितं पसत्थं । ततियं संवरदारं समत्तंतिबेमि । २६ ॥ द्वारं ३ (८) ॥ जंबू ! एत्तो य बंभचेरं उत्तमतवनियमणाणदं-
सणचरित्तसम्मत्तविणयमूलं यमनियमगुणप्पहाणजुत्तं हिमवंतमहंततेयमंतं पसत्थगंभीरअतुच्छथिमितमज्झं अज्जवसाहुजणाचरितं मोक्खमग्गं विसुद्धसिद्धिगतिनिलयं (१३३)

सासयमश्वाबाहमपुणभवं पसत्थं सोमं सुभं सिवमचलमक्खयकरं जतिवरसारक्खितं सुचरियं सुभासियं नवरि मुणिवरेहिं महापुरिसधीरसूरधम्मियधितिमंताण य सया विसुद्धं भवं भञ्जणाणुचिन्नं निस्संकियं निब्भयं नित्तुसं निरायासं निरुवलेवं निव्वुतिघरं नियमनिष्पकं तवसंजममूलदलियणेम्मं पंचमहव्वयसुरक्खियं समितिगुत्तिगुत्तं ज्ञाणवरकवाडसुकय मज्झप्पदिन्नफलिहं सन्नदोच्छइयदुग्गइपहं सुगतिपहदेसगं च लोगुत्तमं च वयमिणं पउमसरतलागपालिभूयं महासगडअरगतुंबभूयं महाविडिमरुक्खक्खंधभूयं महानगरपागारकवाडफलिहभूयं रज्जुपिणिद्धो व इंदकेतू विसुद्धेगगुणसंपिणद्धं जंमि य भग्गमि होइ सहसा सव्वं संभग्गमथियचुन्नियकुसल्लियपल्लट्टपडियखंडियपरिसडियविणासियं विणयसीलतवनि- यमगुणसमूहं तं बंभं भगवंतं गहगणनक्खत्ततारगाणं व जहा उडुपती मणिमुत्तिसिलप्पवालरत्तरयणागराणं व जहा समुद्धो वेरुलिओ चेव जहा मणीणं जहा मउडो चेव भूसणाणं वत्थाणं चेव खोमजुयलं अरविंदं चेव पुप्फजेट्टं गोसीसं चेव चंदणाणं हिमवंतो चेव नगाणं बम्भी ओसहीणं सीतोदा चेव निन्नगाणं उदहीसु जहा सयंभूरमणो रुयगवरे चेव मंडलिकपव्वयाणं पवरे एरावण इव कुंजराणं सीहोव्व जहा मिगाणं पवरे पवकाणं चेव वेणुदेवे धरणो जह पण्णगइंदराया कप्पाणं चेव बंभलोए सभासु य जहा भवे सुहम्मा ठितिसु लवसत्तमव्व पवरा दाणाणं चेव अभयदाणं किमिराओ चेव कंबलाणं संघयणे चेव वज्जरिसभे संठाणे चेव समचउरंसे ज्ञाणेसु य परमसुक्कज्ञाणं णाणेसु य परमकेवलं तु सिद्धं लेसासु य परमसुक्कलेस्सा तित्थंकरे जहा चेव मुणीणं वासेसु जहा महाविदेहे गिरिराया चेव मंदरवरे वणेसु जह नंदणवणं पवरं दुमेसु जहा ज्जंबू सुदंसणा वीसुयजसा जीय नामेण य अयं दीवो, तुरगवती गयवती रहवती नरवती जह वीसुए चेव राया रहिए चेव जहा महारहगते, एवमणेगा गुणा अहीणा भवंति एकंमि बंभचेरगुणे जंमि य आराहियंमि आराहियं वयमिणं सच्चं सीलं तवो य विणओ य संजमो य खंती गुत्ती मुत्ती तहेव इहलोइयपारलोइयजसे य कित्ती य पच्चओ य, तम्हा निहुएण बंभचेरं चरियव्वं सव्वओ विसुद्धं जावजीवाए जाव सेयट्टिसंजउत्ति, एवं भणियं वयं भगवया, तं च इमं- 'पंचमहव्वयसुव्वयमूलं, समणमणाइलसाहुसुचिन्नं । वेरविरामणपज्जवसाणं, सव्वसमुद्धमहोदधितित्थं ॥ १२ ॥ तित्थंकरेहि सुदेसियमग्गं, नरयतिरिच्छ- विवज्जियमग्गं । सव्वपवित्तिसुनिम्मियसारं, सिद्धिविमाणअवंगुयदारं ॥ १३ ॥ देवनरिंदनमंसियपूयं, सव्वजगुत्तममंगलमग्गं । दुद्धरिसं गुणनायकमेक्कं, मोक्खपहस्स वडिसकभूयं ॥ १४ ॥ जेण सुद्धचरिएणं भवइ सुवंबणो सुम्मणो सुसाहु सुइसी सुमुणी सुसंजए, स एव भिक्खू जो सुद्धं चरति बंभचेरं, इमं च रतिरागदोसमोहपवड्ढणकरं किंमज्झ(ज)पमायदोसपा- सत्थसीलकरणं अब्भंगणाणि य तेल्लमज्जणाणि य अभिक्खणं कक्खासीसकरचरणवदणधोवणसंवाहणगायकम्मपरिमहणाणुलेवणचुन्नवासधूवणसरीरपरिमंडणबाउसियहसियभणियन- ट्टगीयवाइयनडनट्टकजल्लमल्लपेच्छणवेलंबकज्जाणि य सिंगारागाराणि (प्र० रकारणाणि) य अज्जाणि य एवमादियाणि तवसंजमबंभचेरघातोवघातियाइं अणुचरमाणेणं बंभचेरं वज्जेयव्वाइं सव्वकालं, भावेयव्वो भवइ य अंतरप्पा इमेहिं तवनियमसीलजोगेहिं निच्चकालं, किं ते ?-अण्हाणअदंतधावणसेयमलजल्लधारणं मूणवयकेसलोयखमदमअचेलगखुप्पिवासलाघवसीतो- सिणकट्टसेज्जाभूमिनिसेज्जापरघरपवेसलद्धावलद्धमाणावमाणनिंदणदंसमसगफासनियमतवगुणविणयमादिएहिं जहा से थिरतरकं होइ बंभचेरं, इमं च अबंभचेरविरमणपरिक्खणट्टयाए पावयणं भगवया सुकहियं अत्तहितं पेच्चाभाविकं आगमेसिभइं सुद्धं नेयाउयं अकुडिलं अणुत्तरं सव्वदुक्खपावाण विउसवणं, तस्स इमा पंच भावणाओ चउत्थवयस्स होंति अबंभचे- रवेरमणपरिक्खणट्टयाए, पढमं सयणासणघरदुवारअंगणआगासगवक्खसालअभिलोयणपच्छवत्थुकपसाहणकण्हाणिकावकासा अवकासा जे य वेसियाणं अच्छंति य जत्थ इत्थिका- ओ अभिक्खणं मोहदोसरतिरागवड्ढणीओ कहिति य कहाओ बहुविहाओ तेऽवि हु वज्जणिज्जा इत्थीसंसत्तसंकिलिट्ठा अच्चेवि य एवमादी अवकासा ते हु वज्जणिज्जा जत्थ मणोवि- ब्भमो वा भंगो वा भस्सणा वा अट्ठं रुद्धं च हुज्ज ज्ञाणं तं तं वज्जेज्ज वज्जभीरू अणायतणं अंतपंतवासी एवमसंपत्तवासवसहीसमितिजोगेण भावितो भवति अंतरप्पा आरतमणविरयगाम- धम्मं जित्तिदिए बंभचेरगुत्ते, बितियं नारीजणस्स मज्झे न कहेयव्वा कहा विचित्ता विब्बोयविलाससंपउत्ता हाससिंजारलोइयकहव्व अणायतणं अन्तपन्तवासी एवमसंसत्तवासव- सधी मोहजणणी न आवाहविवाहवरकहाविव इत्थीणं वा सुभगदुभगकहा चउसट्ठिं च महिलागुणा न वन्नदेसजातिकुलरूवनामनेवत्थपरिजणकहा इत्थियाणं अज्जावि य एवमादियाओ कहाओ सिंगारकलणाओ तवसंजमबंभचेरघातोवघातियाओ अणुचरमाणेणं बंभचेरं न कहेयव्वा न सुणेयव्वा न चित्तेयव्वा, एवं इत्थीकहविरतिसमितिजोगेण भावितो भवति अंतर- प्पा आरतमणविरयगामधम्मं जित्तिदिए बंभचेरगुत्ते, ततीयं नारीण हसितभणितचेट्टियविप्पेक्खितगइविलासकलियं विब्बोतियनट्टगीतवातियसरीरसंठाणवन्नकरचरणनयणलावन्नरू- वजोव्वणपयोहराधरवत्थालंकारभूसणाणि य गुज्झोवकासियाइं अन्नाणि य एवमादियाइं तवसंजमबंभचेरघातोवघातियाइं अणुचरमाणेणं बंभचेरं न चक्खुसा न मणसा न वयसा पत्थेयव्वाइं पावकम्माइं, एवं इत्थीरूवविरतिसमितिजोगेण भावितो भवति अंतरप्पा आरतमणविरयगामधम्मं जित्तिदिए बंभचेरगुत्ते, चउत्थं पुव्वरयपुव्वकीलियपुव्वसंगंथगंथसंथुया

जे ते आवाहविवाहचोल्लकेसु य तिथिसु जन्नेसु उस्सवेसु य सिंगारागारचारुवेसाहिं हावभावपललियविकखेवविलाससालिणीहिं अणुकूलपेम्मिकाहिं सद्धिं अणुभूया सयणसंपओगा उदुसुहवरकुसुमसुरभिचंदणसुगंधिवरवासधूवसुहफरिसवत्थभूसणगुणोववेया रमणिजाउजगेयपउरा नडनट्टगजल्लमल्लमुट्टिकवेलंबगकहगपवगलासगआइक्खगलंखमंखतूणइल्लतुंबवी-
णियताल्लयरपकरणाणि य बहूणि महुरसरगीतसुस्सराइं अन्नाणि य एवमादियाणि तवसंजमबंभचेरघातोवघातियाइं अणुचरमाणेणं बंभचेरं न तातिं समणेणं लब्भा दट्ठं न कहेउं नवि सुमरिउं जे, एवं पुव्वरयपुव्वकीलियविरतिसमितिजोगेण भावितो भवति अंतरप्पा आरयमणविरतगामधम्म जेइंदिए बंभचेरगुत्ते, पंचमगं आहारपणीयनिद्धभोयणविवज्जते संजते सुसाहू ववगयखीरदहिसप्पिनवनीयतेल्लगुलखंडमच्छंडिकमहुमज्जमंसखज्जकविगतिपरिचत्तकयाहारे ण दप्पणं न बहुसो न नितिकं न सायसूपाहिकं न खदं तहा भोत्तव्वं जह से जाया-
माता य भवति, न य भवति विब्भमो न भंसणा य धम्मस्स, एवं पणीयाहारविरतिसमितिजोगेण भावितो भवति अंतरप्पा आरयमणविरतगामधम्म जेइंदिए बंभचेरगुत्ते, एवमिणं संवरस्स दारं सम्मं संवरियं होइ सुपणिहितं इमेहिं पञ्चहिवि कारणेहिं मणवयणकायपरिक्खएहिं णिच्चं आमरणंतं च एसो जोगो णेयवो धितिमया मतिमया अणासवो अकलुसो अ-
च्छिदो अपरिस्सावी असंकिलिट्ठो सुद्धो सब्बजिणमणुत्तातो, एवं चउत्थं संवरदारं फासियं पालितं सोहितं तीरितं किट्ठितं आणाए अणुपालियं भवति, एवं नायमुणिणा भगवया पन्नवियं परूवियं पसिद्धं सिद्धवरसासणमिणं सिद्धं आघवियं सुदेसितं पसत्थं, चउत्थं संवरदारं समत्तंतिबेमि । २७ ॥ द्वारं ४ (९) ॥ जंबू ! अपरिग्गहसंवुडे य समणे आरंभपरिग्गहातो विरते विरते कोहमाणमायालोभा एगे असंजमे दो चेव रागदोसा तिन्नि य दंडगारवा य गुत्तीओ तिन्नि तिन्नि य विराहणाओ चत्तारि कसाया ज्ञाणसन्नाविकहा चउरो पंच य किरियाओ समिति इंदियमहवयाइं च छ जीवनिकाया छच्चलेसाओ सत्त भया अट्ट य मया नव चेव य बंभचेरवयगुत्ती दसप्पकारे य समणधम्म एक्कारस य उवासकाणं बारस य भिक्खूणं पडिमा कि-
रियठाणा य भूयगामा परमाधम्मिया गाहासोल्लसया असंजमअबंभणायअसमाहिठाणा सबला परिसहा सूयगडज्झयणदेवभावणउदेसगुणपक्कपावसुतमोहणिज्जे सिद्धातिगुणा य जोगसंगहे तिच्चीसा आसातणा सुरिंदा आदिं एक्कातियं करेत्ता एकुत्तरियाए वड्ढीए तीसातो जाव उ भवे तिकाहिका विरतीपणिहीसु अविरतीसु य एवमादिसु बहूसु ठाणेसु जिणप-
सत्थेसु अवितहेसु सासयभावेसु अवट्ठिएसु संकं कंखं निराकरेत्ता सहहते सासणं भगवतो अणियाणे अगारवे अलुद्धे अमूढमणवयणकायगुत्ते । २८ । जो सो वीरवरवयणविरतिपवित्थ-
रबहुविहप्पकारो सम्मत्तविसुद्धमूलो धितिकंदो विणयवेतितो निग्गततिलोक्कविपुलजसनिविड (प्र० चित) पीणपवरसुजातखंधो पंचमहवयविसालसालो भावणतयंतज्झाणसुभजोगना-
णपल्लववरंकुरधरो बहुगुणकुसुमसमिद्धो सीलसुगंधो अणहवफलो पुणो (प्र० पुणोवि) य मोक्खवरबीजसारो मंदरगिरिसिहरचूलिका इव इमस्स मोक्खवरमुत्तिमग्गस्स सिहरभूओ संवरवरपादपो चरिमं संवरदारं, जत्थ न कप्पइ गामागरनगरखेडकब्बडमडंबदोणमुहपट्टणासमगयं च किंचि अप्पं व बहुं व अणुं व थूलं व तसथावरकायदव्वजायं मणसावि परिघेत्तुं
ण हिरन्नसुवन्नखेत्तवत्थुं न दासीदासभयकपेसहयगयगवेलगकंबलजाणजुग्गसयणासणाइ ण छत्तकं न कुंडिता न उवाणहा न पेहुणवीयणतालियंटका ण यावि अयतउयतंबसीसक-
कंसरयतजातरूवमणिमुत्ताधारपुडकसंखदंतमणिसिंसले (लेस पा०) कायवरचेलचम्मपत्ताइं महरिहाइं परस्स अज्झोववायलोभजण (प्र० कर) णाइं परियड्ढेउं गुणवओ न यावि पुप्फ-
फलकंदमूलादियाइं सणसत्तरसाइं सब्बधन्नाइं तीहिवि जोगेहिं परिघेत्तुं ओसहभेसज्जभोयणट्टयाए संजएणं, किं कारणं ?, अपरिमितणाणदंसणधरेहिं सीलगुणविणयतवसंजमनायकेहिं
तित्थयरेहिं सब्बजगज्जीववच्छलेहिं तिलोयमहिएहिं जिणवरिंदेहिं एस जोणी जंगमाणं दिट्ठा न कप्पइ जोणिसमुच्छेदोत्ति तेण वज्जंति समणसीहा, जंपिय ओदणकुम्मासगंजतप्पण-
(प्र० लगण) मंथुभुजियपललसूपसकुलिवेढिमव (प्र० वे) सरकचुन्नकोसगपिंडसिहरिणिवट्टमोयगखीरदहिसप्पिनवनीततेल्लगुलखंडमच्छंडियमधुमज्जमंसखज्जकवंजणविधिमादिकं पणीयं
उवस्सए परघरे व रत्ते न कप्पती तंपि सन्निहिं काउं सुविहियाणं, जंपिय उडिट्ठवियरचियगपज्जवजातं पकिण्णपाउकरणपामिच्चं मीसकजायं कीयकडपाहुडं च दाणट्टपुन्नपगडं सम-
णवणीमगट्टयाए व कयं पच्छाकम्मं पुरेकम्मं निच्चकम्मं मक्खियं अतिरित्तं मोहरं चेव सयग्गहमाहडं मट्ठिओवलित्तं अच्छेज्जं चेव अणीसट्ठं जं तं तिहीसु जन्नेसु उस्सवेसु य अंतो व
बहिं व होज्ज समणट्टयाए ठवियं हिंसासावज्जसंपउत्तं न कप्पती तंपिय परिघेत्तुं, अह केरिसयं पुणाइ कप्पति ?, जं तं एक्कारसपिंडवायसुद्धं किण्णहणणपयणकयकारियाणुमोयणन-
वकोडीहिं सुपरिसुद्धं दसहि य दोसेहिं विप्पमुक्कं उग्गमउप्पायणेसणाए सुद्धं ववगयचुयचवियचत्तदेहं च फासुयं ववगयसंजोगमणिंगालं विगयधूमं छट्ठाणनिमित्तं छक्कायपरिक्खणट्टा
हणि २ फासुकेण भिक्खेण वट्ठियव्वं, जंपिय समणस्स सुविहियस्स उ रोगायंके बहुप्पकारंमि समुप्पन्ने वाताहिकपित्तसिंभअतिरित्तकुविय तह सन्निवातजाते व उदयपत्ते उज्जलबल-
विउलतिउलकक्खडपगाढदुक्खे असुभकडुयफरुसे चंडफलविवागे महब्भए जीवियंतकरणे सब्बसरीरपरितावणकरे न कप्पती तारिसेवि तह अप्पणो परस्स वा ओसहभेसज्जं भत्तपाणं

च तं पि संनिहिकयं, जंपिय समणस्स सुविहियस्स तु पडिग्गहधारिस्स भवति भायणभंडोवहिउवकरणं पडिग्गहो पादबंधणं पादकेसरिया पादठवणं च पडलाइं तिन्नेव रयत्ताणं च गोच्छओ तिन्नेव य पच्छाका रयोहरणचोलपट्टकमुहणंतकमादीयं एयंपिय संजमस्स उववूहणट्टयाए बायायवदंसमसगसीयपरिक्खणट्टयाए उवगरणं रागदोसरहियं परिहरियव्वं संज. एणं णिच्चं पडिलेहणपप्फोडणपमज्जाए अहो य राओ य अप्पमत्तेण होइ सततं निक्खिवियव्वं च गिण्हियव्वं च भायणभंडोवहिउवकरणं, एवं से संजते विमुत्ते निस्संगे निप्परिग्गहरूई निम्ममे निन्नेहबंधणे सव्वपावविरते वासीचंदणसमाणकप्पे समतिणमणिमुत्तालेट्ठुकंचणे समे य माणावमाणणाए समियरते समितरागदोसे समिए समितीसु सम्मदिट्ठी समे य जे सव्वपाणभूतेसु से हु समणे सुयधारते उज्जुते संजते स साहू सरणं सव्वभूयाणं सव्वजगवच्छले सव्वभासके य ससारतट्टिते य संसारसमुच्छिन्ने सततं मरणाणुपारते पारगे य सव्वेसिं संस-याणं पवयणमायाहिं अट्ठहिं अट्ठकम्मगंठीविमोयके अट्ठमयमहणे ससमयकुसले य भवति सुहदुक्खनिव्विसेसे अग्गिभतरबाहिरंमि सया तवोवहाणंमि य सुट्ठुज्जुते खंते दंते य हिय- (धिति पा०) निरते ईरियासमिते भासासमिते एसणासमिते आयाणभंडमत्तनिकखेवणासमिते उच्चारपासवणखेलसिंघाणजल्लुपारिट्ठावणियासमिते मणगुत्ते वयगुत्ते कायगुत्ते गुत्तिदिए गुत्तबंधयारी चाई लज्जू धन्ने तवस्सी खंतिखमे जित्तिदिए सोधिए अणियाणे अबहिल्लेस्से अममे अकिंचणे छिन्नगंधे (सोए पा०) निरुवलेवे सुविमलवरकंसभायणं व मुक्कतोए संखेविव निरंजणे विगयरगदोसमोहे कुम्भोइव इंदिएसु गुत्ते जच्चकंचणगं व जायरूवे पोक्खरपत्तं व निरुवलेवे चंदो इव सोमत्ताए (भावयाए पा०) सूरुव दित्ततेए अचले जह मंदरे गिरिवरे अक्खोभे सागरोव्व थिमिए पुढवीव सव्वफाससहे तवसा चिय(प्र० इव)भासरासिछन्निव्व जाततेए जल्लियहुयासणोविव तेयसा जल्लंते गोसीसचंदणंपिव सीयले सुगंधे य हरएविव समियतावे उग्घोसियसुनिम्मलं व आयंसमंडलतलं व पागडभावेण सुद्धभावे सौंडीरे कुंजरोव्व वसभेव्व जायथामे सीहेवा जहा मिगाहिवे होति दुप्पधरिसे सारयसलिलं व सुद्धहियये भारंडे चेव अप्पमत्ते खग्गिविसाणं व एगजाते खाणुं चेव उड्ढकाए सुन्नागारेव्व अप्पडिकम्मे सुन्नागारावणरसंतो निवायसरणप्पदीपज्झाणमिव निप्पकं पे जहा खुरो चेव एगधारे जहा अही चेव एगदिट्ठी आगासं चेव निरालंवे विहगेविव सव्वओ विप्पमुक्के कयपरनिलए जहा चेव उरए अप्पडिबद्धे अनिलोव्व जीवोव्व अप्पडिहयगती गामे एकरायं नगरे य पंचरायं० दूइज्जंते य जित्तिदिए जितपरीसहे निब्भओ विऊ (सुद्धो पा०) सच्चित्ताचित्तमीसकेहिं दव्वेहिं विरायं गते संचयातो विरए मुत्ते लहुके निरवकंखे जीवियमरणासभयविप्पमुक्के निस्संधिं निव्वणं चरित्तं धीरे काएण फासयंते सततं अज्झप्पज्झाणजुत्ते निहुए एगे चरेज्ज धम्मं, इमं च परिग्गहवेरमणपरिक्खणट्टयाए पावयणं भगवया सुकहियं अत्तहियं पेच्चाभाविकं आ-गमेसिभदं सुद्धं नेयाउयं अकुडिलं अणुत्तरं सव्वदुक्खपावाण विओसमणं, तस्स इमा पंच भावणाओ चरिमस्स वयस्स होंति परिग्गहवेरमणरक्खणट्टयाए-पढमं सोइंदिएण सोच्चा सदाइं मणुन्नभदगाइं, किं ते?, वरमुरयमुइंगपणवददुदुरकच्छभिवीणाविपंचीवल्लयिवद्धीसकसुघोसनंदिसुसरपरिवादिणिवंसतूणकपक्कतंतीतलतालतुडियनिग्घोसगीयवाइयाइं नडनट्टकजल्ल- **मल्लमुट्टिकवेलंबककहकपवकलासगआइक्खकलंखमंखतूणइल्लतुंबवीणियतालायरपकरणाणि य बहूणि महुरसरगीतसुस्सरतिं कंचीमेहलाकलावपत्तरकपहेरकपायजालगघंटियखिखि-** णिरयणोरुजालियल्लुदियनेउरचलणमालियकणगनियलजालभूसणसदाणि लीलाचंकम्ममाणाणुदीरियाइं तरुणीजणहसियभणियकलरिभितमंजुलाइं गुणवयणाणि व बहूणि महुरजण-भासियाइं अन्नेसु य एवमादिएसु सहेसु मणुन्नभदएसु ण तेसु समणेणं सज्जियव्वं न रज्जियव्वं न गिज्झियव्वं न मुज्झियव्वं न विनिग्घायं आवज्जियव्वं न लुभियव्वं न तुसियव्वं न हसियव्वं न सइं च मइं च तत्थ कुज्जा, पुणरवि सोइंदिएण सोच्चा सदाइं अमणुन्नपावकाइं, किं ते?, अक्कोसफरुसखिसणअवमाणणतज्जणनिब्भंल्लणदित्तवयणतासणउक्कजियरुन्नरडि-यकंदियनिग्घुट्टरसियकलुणविलवियाइं अन्नेसु य एवमादिएसु सहेसु अमणुण्णपावएसु न तेसु समणेण रूसियव्वं न हीलियव्वं न निंदियव्वं न खिसियव्वं न छिंदियव्वं न भिंदियव्वं न वहेयव्वं न दुगुंछावत्तियाए लब्भा उप्पाएउं, एवं सोतिंदियभावणाभावितो भवति अंतरप्पा मणुन्नामणुन्नसुब्भिदुब्भिरागदोसप्पणिहियप्पा साहू मणवयणकायगुत्ते संवुडे पणिहितिं-दिए चरेज्ज धम्मं, वितियं चक्खिदिएण पासिय रूवाणि मणुन्नाइं भदकाइं सच्चित्ताचित्तमीसकाइं कट्ठे पोत्थे य चित्तकम्मे लेप्पकम्मे सेले य दंतकम्मे य पंचहिं वण्णेहिं अणेगसं-ठाणसंथियाइं गंठिमवेढिमपूरिमसंघातिमाणि य मल्लाइं बहुविहाणि य अहियं नयणमणसुहकराइं वणसंडे पव्वते य गामागरनगराणि य खुदियपुक्खरिणिवावीदीहियगुंजालियसरसरपं-तियसागरविलपंतियखादियनदीसरतलागवप्पिणीफुल्लुप्पलपउमसंडपरिमंडियाभिरामे अणेगसउणगणमिहुणविचरिए वरमंडवविविहभवनतोरणचेतियदेवकुलसभप्पवावसहसुकयसय-णासणसीयरहसयडजाणजुग्गसंदणनरनारीगणे य सोमपडिरूवदरिसणिज्जे अलंकितविभूसिते पुव्वकयतवप्पभावंसोहग्गसंपउत्ते नडनट्टगजल्लमल्लमुट्टियवेलंबगकहगपवगलासगआइक्ख-गलंखमंखतूणइल्लतुंबवीणियतालायरपकरणाणि य बहूणि सुकरणाणि अन्नेसु य एवमादिएसु रूवेसु मणुन्नभदएसु न तेसु समणेणं सज्जियव्वं न रज्जियव्वं जाव न सइं च मइं च तत्थ

कुज्जा, पुणरवि चक्खिदिएण पासिय रूवाइं अमणुन्नपावकाइं, किं ते?, गण्डिकोढिककुणिउदरिकच्छुल्लपइल्लकुज्जपंगुलवामणअंधिल्लगएगचक्खुविणिहय(पीढ)सप्पिसल्लगवाहिरोगपी-
 लियं विगयाणि य मयककलेवराणि सकिमिणकुहियं च दव्वरासिं अन्नेसु य एवमादिएसु अमणुन्नपावतेसु न तेसु समणेणं रूसियव्वं जाव न दुगुंछावत्तियावि लब्भा उप्पातेउं. एवं
 चक्खिदियभावणाभावितो भवति अंतरप्पा जाव चरेज्ज धम्मं, ततियं घाणिदिएणं अग्घाइय गंधातिं मणुन्नभदगाइं, किं ते?, जलयथलयसरसपुष्पफलपाणभोयणकुट्टतगरपत्तचो-
 ददमणकमरुयएल्लरसपिकमंसिगोसीससरसचंदणकप्पूरलवंगअगरकुंकुमककोलउसीरसेयचंदणसुगन्धसारंगजुत्तिवरधूववासे उउयपिंडिमणिहारिमगंधिएसु अन्नेसु य एवमादिएसु गंधेसु
 मणुन्नभदएसु न तेसु समणेण सज्जियव्वं जाव न सतिं च मतिं च तत्थ कुज्जा, पुणरवि घाणिदिएण अग्घातिय गंधाणि अमणुन्नपावकाइं, किं ते?, अहिमडअस्समडहत्थिमडगोमड-
 विगसुणगसियालमणुयमजारसीहदीवियमयकुहियविणट्टकिविणबहुदुरभिगंधेसु अन्नेसु य एवमादिएसु गंधेसु अमणुन्नपावएसु न तेसु समणेण रूसियव्वं जाव पणिहियपंचिदिए
 चरेज्ज धम्मं, चउत्थं जिब्भिदिएण साइय रसाणि उ मणुन्नभदकाइं, किं ते?, उग्गाहिमविविहपाणभोयणगुलकयखंडकयतेल्लघयकयभक्खेसु बहुविहेसु लवणरससंजुत्तेसु महुमंसबहु-
 प्पगारमज्जियनिट्टाणगदालियंबसेहंबदुद्धदहिसरयमज्जवरवारुणीसीहुकाविसायणसायट्टारसबहुप्पगारेसु भोयणेसु य मणुन्नवन्नगंधरसफासबहुदव्वसंभितेसु अन्नेसु य एवमादिएसु रसेसु
 मणुन्नभदएसु न तेसु समणेण सज्जियव्वं जाव न सइं च मतिं च तत्थ कुज्जा, पुणरवि जिब्भिदिएण सायिय रसातिं अमणुन्नपावगाइं, किं ते?, अरसविरससीयलुक्खणिज्जप्पपाणभो-
 यणाइं दोसीणवावन्नकुहियपूइयअमणुन्नविणट्टपसूयबहुदुब्भिगंधियाइं तित्तकडुयकसायअंबिलरसल्लिंडनीरसाइं अन्नेसु य एवमातिएसु रसेसु अमणुन्नपावएसु न तेसु समणेणं रूसि-
 यव्वं जाव चरेज्ज धम्मं, पंचमगं फासिदिएण फासिय फासाइं मणुन्नभदकाइं, किं ते?, दगमंडवहारसेयचंदणसीयलविमलजलविविहकुसुमसत्थरओसीरमुत्तियमुणालदोसिणापेहुण-
 उक्खेवगतालियंटीवीयणगजणियसुहसीयले य पवणे गिम्हकाले सुहफासाणि य बहूणि सयणाणि आसणाणि य पाउरणगुणे य सिसिरकाले अंगारपतावणा य आयवनिद्धमउयसीयउ-
 सिणलहुया य जे उदुसुहफासा अंगसुहनिबुडकरा ते अन्नेसु य एवमादितेसु गिज्झियव्वं न फासेसु मणुन्नमदएसु न तेसु समणेण सज्जियव्वं न रज्जियव्वं न मुज्झियव्वं न मुच्छियव्वं न
 विणिग्घायं आवज्जियव्वं न लुभियव्वं न अज्झोववज्जियव्वं न तूसियव्वं न हसियव्वं न सतिं च मतिं च तत्थ कुज्जा, पुणरवि फासिदिएण फासिय फासातिं अमणुन्नपावकाइं, किं ते?,
 अणेगवधबंधतालणतज्जणअतिभारारोवणए अंगभंजणसूतीनखप्पवेसगायपच्छायणलक्खारसखारतेल्लकलकलंततउअसीसककाल्लोहसिंचणहडिबंधणरज्जुनिगलसंकलहत्थंडुयकुंभिपा-
 कदहणसीहपुच्छणउब्बंधणसूलभेयगयचलणमलणकरचरणकन्ननासोट्टसीसछेयणजिब्भंछणवसणनयणहिययदंतभंजणजोत्तलयकसप्पहारपादपणिहजाणुपत्थरनिवायपीलणकविकच्छु-
 अगाणि विच्छुयडक्कवायातवदंसमसकनिवाते दुट्टणिसेज्जणिसीहियदुब्भिकक्खडगुरूसीयउसिणलक्खेसु बहुविहेसु अन्नेसु य एवमाइएसु फासेसु अमणुन्नपावकेसु न तेसु समणेण
 रूसियव्वं न हीलियव्वं न निंदियव्वं न गरहियव्वं न खिसियव्वं न छिंदियव्वं न भिंदियव्वं न वहेयव्वं न दुगुंछावत्तियं च लब्भा उप्पाएउं, एवं फासिंदियभावणाभावितो भवति अंतरप्पा अमणु-
 न्नामणुन्नमुब्भिसुब्भिरागदोसपणिहियप्पा साहु मणवयणकायगुत्ते संवुडे पणिहितिदिए चरिज्ज धम्मं। एवमिणं संवरस्स दारं सम्मं संवरियं होइ सुप्पणिहियं इमेहिं पंचहिवि कार-
 णेहिं मणवयकायपरिरक्खिएहिं निच्चं आमरणंतं च एस जोगो नेयव्वो धितिमया मतिमया अणासवो अकलुसो अच्छिदो अपरिस्सावी असंकिलिट्ठो सुद्धो सब्बजिणमणुन्नातो. एवं
 पंचमं संवरदारं फासियं पालियं सोहियं तीरियं किट्टियं अणुपालियं आणाए आराहियं भवति, एवं नायमुणिणा भगवया पन्नवियं परूवियं पसिद्धं सिद्धं सिद्धवरसासणमिणं आघवियं
 सुदेसियं पसत्थं। पंचमं संवरदारं समत्तंतिबेमि ॥ द्वारं ५ (१०) ॥ एयातिं वयाइं पंचवि सुव्वयमहव्वयाइं हेउसयविचित्तपुक्खलाइं कहियाइं अरिहंतसासणे पंच समासेण संवरा वित्थरेण
 उ पणवीसतिसमियसहियसंवुडे सया जयणघडणसुविमुद्धदंसणे एए अणुचरिय संजते चरमसरीरधरे भविस्सतीति । २९। पण्हावागरणे णं एगो सुयक्खंधो दस अज्झयणा एकसरगा
 दससु चेव दिवसेसु उदिसिज्जंति एगंतरेसु आयंबिलेसु निरुद्धेसु आउत्तभत्तपाणएणं अंगं जहा आयासरस । ३०॥ श्रीप्रश्नव्याकरणांगमुत्कीर्ण श्रीसिद्धाद्रिगतजैनागममंदिरे वीरप्रभो: २४६८।